

歷朝

種五十三百二

部大觀

古今說海

明雲間陸氏原編

集成圖書公司印行

集寅

編三第選說



大同大學圖書館
LA UNIVERSITATO UTOPIA
LIBRARY

Class No. 8-70-8

陸

Accession No. 11-0366

Volumes in all 12

Remarks:

上海图书馆藏书



A541 212 0017 0122B

明
雲
間
陸
氏
原
編

說
選

集
成
圖
書
公
司
印



~~1559911~~


直統率一夏卯冬

夷次志人真師

欽定四庫全書提要

真臘風土記一卷

元周達觀撰達觀溫州人真臘本南海中小國爲扶南之屬其後漸以強盛自隋書始見於外國傳唐宋二史並皆紀錄而朝貢不常至故所載風土方物往往疎略不備元成宗元貞元年乙未遣使招諭其國達觀隨行至大德元年丁酉乃歸首尾三年諳悉其俗因記所聞見爲此書凡四十則文義頗爲賅贍惟第三十六則內記瀆倫神譴一事不以爲天道之常而歸功於佛則所見殊陋然元史不立真臘傳得此而本末詳具猶可以補其佚闕是固宜存備參訂作職方之外紀者矣達觀作是書成以示吾邱衍衍爲題詩推挹甚至見衍所作竹素山房詩集中蓋衍亦服其敘述之工云



古今說海

真臘風土記目錄

總敘

城郭

宮室

服飾

官屬

三教

人物

產婦

室女

奴婢

語言

野人

文字

正朔時序

爭訟

病癩

死亡

耕種

山川

出產

貿易

欲得唐貨

草木

飛鳥

走獸

蔬菜

魚龍

醞釀

鹽醋醬麪

蠶桑

器用

車轎

舟楫

屬郡

村落

取膽

異事

澡浴

流寓

軍馬

國主出入

目錄終

古今說海

真臘風土記

說選十五 偏記十二

總敘

真臘國或稱占臘其國自稱曰甘孛智今聖朝按西番經名其國曰漱浦只蓋亦甘孛智之近音也自溫州開洋行丁未針歷閩廣海外諸州港口過七洲洋經交趾洋到占城又自占城順風可半月到真蒲乃其境也又自真蒲行坤申針過崑崙洋入港港凡數十惟第四港可入其餘悉以沙淺故不通巨舟然而彌望皆修藤古木黃沙白葦倉卒未易辨認故舟人以尋港爲難事自港口北行順水可半月抵其地曰查南乃其屬郡也又自查南換小舟順水可十餘日過半路村佛村渡淡洋可抵其地曰千傍取城五十里按諸番志稱其地廣七千里其國北抵占城半月路西南距暹羅半月程南距番禺十日程其東則大海也舊爲通商來往之國聖朝誕膺天命奄有四海峻都元帥之置省占城也嘗遣一虎符百戶一金牌千戶同到本國竟爲拘執不返元貞之乙未六月聖天子遣使招諭俾余從行以次年丙申二月離明州

二十日自溫州港口開洋三月十五日抵占城中途逆風不利秋七月始至遂得臣服至大德丁酉六月回舟八月十二日抵四明舶岸其風土國事之詳雖不能盡知然其大略亦可見矣

城郭

州城周圍可二十里有五門門各兩重惟東向開二門餘向皆一門城之外巨濠濠之外皆通衢大橋橋之兩傍各有石神五十四枚如石將軍之狀甚巨而獍五門皆相似橋之闌皆石爲之鑿爲蛇形蛇皆九頭五十四神皆以手拔蛇有不容其走逸之勢城門之上有大石佛頭五面向西方中置其一飾之以金門之兩旁鑿石爲象形城皆疊石爲之可二丈石甚周密堅固且不生繁草卻無女牆城之上間或種桄榔木比比皆空屋其內向如坡子厚可十餘丈坡上皆有大門夜閉早開亦有監門者惟狗不許入門其城甚方整四方各有石塔一座曾受斬趾刑人亦不許入門當國之中有金塔一座傍有石塔二十餘座石屋百餘間東向金橋一所金獅子二枚列於橋之左右金佛八身列於石屋之下金塔至北可一里許有銅塔一座比金塔

更高望之鬱然其下亦有石屋十數間又其北一里許則國主之廬也其寢室又有金塔一座焉所以舶商自來有富貴真臘之褒者想爲此也石塔出南門外半里餘俗傳魯般一夜造成魯般墓在南門外一里許周圍可十里石屋數百間東池在城東十里周圍可百里中有石塔石屋塔之中有臥銅佛一身臍中常有水流出北池在城北五里中有金方塔一座石屋數十間金獅子金佛銅象銅牛銅馬之屬皆有之

宮室

國宮及官舍府第皆面東國宮在金塔金橋之北近門周圍可五六里其正室之瓦以鉛爲之餘皆土瓦黃色橋柱甚巨皆雕畫佛形屋頭壯觀修廊複道突兀參差稍有規模其蒞事處有金窗櫺左右方柱上有鏡約有四五十面列放於窗之旁其下爲象形聞內中多有奇處防禁甚嚴不可得而見也其內中金塔國主夜則臥其上十人皆謂塔之中有九頭蛇精乃一國之土地主也係女身每夜則見國主則先與之同寢交媾雖其妻亦不敢入二鼓乃出方可與妻妾同睡若此精一夜不見則番

王死期至矣若番王一夜不往則必獲災禍其次如國戚大臣等屋制度廣袤與常人家迥別周圍皆用草蓋獨家廟及正寢二處許用瓦亦各隨其官之等級以爲屋室廣狹之制其下如百姓之家止草蓋瓦片不敢上屋其廣狹雖隨家之貧富然終不敢倣府第制度也

服飾

自國主以下男女皆椎髻袒裼止以布圍腰出入則加以大布一條纏於小布之上布甚有等級國主所打之布有直金三四兩者極其華麗精美其國中雖自織布暹羅及占城皆有來者往往以來自西洋者爲上以其精巧而細樣故人惟國主可打純花布頭戴金冠子如金剛頭上所戴者或有不戴冠但以線穿香花如茉莉之類周匝於髻間項上戴大珍珠三斤許手足及諸指上皆帶金鐲指展上皆嵌貓兒眼睛石其下跣足足下及手掌皆以紅藥染赤色出則手持金劍百姓間惟婦女可染手足掌男子不敢也大臣國戚可打疎花布惟官人可打兩頭花布百姓間惟婦人可打之新唐人雖打兩頭花布人亦不敢罪之以其暗丁八殺故也暗丁八殺不

識體例也

官屬

國中亦有丞相將帥司天等官其下各設司吏之屬但名稱不同耳大抵皆國戚爲之否則亦納女爲嬪其出入儀從亦有等級用金轎扛四金傘柄者爲上金轎扛二金傘柄者次之金轎扛一金傘柄者又次之止用一金傘柄者又其次之也其下者止用一銀傘柄者而已亦有用銀轎扛者金傘柄以上官皆呼爲巴丁或呼暗丁銀傘柄者呼爲厮辣的傘皆用中國紅絹爲之其裙直拖地油傘皆以綠絹爲之裙卻短

三教

爲儒者呼爲班詰爲僧者呼爲苾姑爲道者呼爲八思惟班詰不知其所祖亦無所謂學舍講習之處亦難究其所讀何書但見其如常人打布之外於項上掛白線一條以此別其爲儒耳由班詰入仕者則爲高上之人項上之線終身不去苾姑削髮穿黃偏袒右肩其下則繫黃布裙跣足寺亦許用瓦蓋中止有一像正如釋迦佛之

狀呼爲孛賴穿紅塑以泥飾以丹青外此別無像也塔中之佛相貌又別皆以銅鑄成無鐘鼓鐃鈸與幢幡寶蓋之類僧皆茹魚肉惟不飲酒供佛亦用魚肉每日一齋皆取辦於齋主之家寺中不設廚竈所誦之經甚多皆以貝葉壘成極其齊整於上寫黑字既不用筆墨但不知其以何物書寫僧亦用金銀轎扛傘柄者國王有大政亦咨訪之却無尼姑入思惟正如常人打布之外但於頭上戴一紅布或白布如韃韃娘子罽姑之狀而略低亦有宮觀但比之寺院較狹而道教者亦不如僧教之盛耳所供無別像但止一塊石如中國社壇中之石耳亦不知其何所祖也卻有女道士宮觀亦得用瓦入思惟不食他人之食亦不令人見食亦不飲酒不曾見其誦經及與人功果之事俗之小兒入學者皆先就僧家教習暨長而還俗其詳莫能考也

人物

人但知蠻俗人物麤醜而甚黑殊不知居於海島村僻尋常閭巷間者則信然矣至如宮人及南棚南棚乃府第也婦女多有其白如玉者蓋以不見天日之光故也大抵一布經腰之外不以男女皆露出胸酥椎髻跣足雖國主之妻亦只如此國主凡有五妻

正室一人四方四人其下嬪婢之屬聞有三五千亦自分等級未嘗輕出戶余每一入內見番主必與正妻同出乃坐正室金窗中諸宮人皆次第列於兩廊窗下徙倚窺視余備獲一見凡人家有女美貌者必召入內其下供內中出入之役者呼爲陳家蘭亦不下一二千卻皆有丈夫與民間雜處只於顛門之前削去其髮如北人開水道之狀塗以銀硃及塗於兩鬢之傍以此爲陳家蘭別耳惟此婦可以入內其下餘人不可得而入也內宮之前後有絡繹於道途間尋常婦女椎髻之外別無釵梳頭面之飾但臂中帶金鐲指中帶金指展且陳家蘭及內中諸宮人皆用之男女身上常塗香藥以檀麝等香合成家家皆修佛事國中多有二形人每日以十數成羣行於墟場間常有招徠唐人之意反有厚饋可醜可惡

產婦

番婦產後卽作熱飯抹之以鹽納於陰戶凡一晝夜而除之以此產中無病且收斂常如室女余初聞而詫之深疑其不然旣而所泊之家有女育子備知其事且次日卽抱嬰兒同往河內澡洗尤所怪見又每見人言番婦多淫產後一兩日卽與夫合

若丈夫不中所欲卽有買臣見棄之事若丈夫適有遠役只可數夜過十數夜其婦必曰我非是鬼如何孤眠淫蕩之心尤切然亦聞有守志者婦女最易老蓋其婚嫁產育既早二三十歲人已如中國四五十人矣

室女

人家養女其父母必祝之曰願汝有人要將來嫁千百個丈夫富室之女自七歲至九歲至貧之家則止於十一歲必命僧道去其童身名曰陣毬蓋官司每歲於中國四月內擇一日頒行本國應有養女當陣毬之家先行申報官司司先結巨燭一條燭間刻畫一處約是夜遇昏點燭至刻畫處則爲陣毬時候矣先期一月或半月或十日父母必擇一僧或一道隨其何處寺觀往往亦自有主顧向上好僧皆爲官戶富室所先貧者亦不暇擇也官富之家饋以酒米布帛檳榔銀器之類至有一百擔者直中國白金二三百兩之物少者或三四十擔或一二十擔隨家豐儉所以貧人家至於十一歲而始行事者爲難辦此物耳亦有捨錢與貧女陣毬者謂之做好事蓋一歲中一僧止可御一女僧既允受更不他許是夜大設飲食鼓樂會親隣門

外縛一高棚裝塑泥人泥獸之屬於其上或十餘或止三四枚貧家則無之各按故事凡七日而始撤既昏以轎傘鼓樂迎此僧而歸以綵帛結二亭子一則坐女於其中一則僧坐其中不曉其口說何語鼓樂之聲喧闐是夜不禁犯夜聞至期與女俱入房親以手去其童納之酒中或謂父母親隣各點於額上或謂俱嘗以口或謂僧與女交媾之事或謂無此但不容唐人見之所以莫知其的至天將明時則又以轎傘鼓樂送僧去後當以布帛之類與僧贖身否則此女終爲此僧所有不可得而他適也余所見者大德丁酉之四月初六夜也前此父母必與女同寢此後則斥於房外任其所之無復拘束隄防之矣至若嫁娶則雖有納幣之禮不過苟簡從事多有先姦而後娶者其風俗既不以爲恥亦不以爲怪也陣毯之夜一巷中或至十餘家城中迎僧道者交錯於途路間鼓樂之聲無處無之

人家奴婢皆買野人以充其役多者百餘少者亦有一二十枚除至貧之家則無之蓋野人者山野中之人也自有種類俗呼爲撞賊到城中亦不敢出入人之家城間

人相罵者一呼之爲撞則恨入骨髓其見輕於人如此少壯者一枚可直百布老弱者止三四十布可得祇許於樓下坐臥若執役方許登樓亦必跪膝合掌頂禮而後敢進呼主人爲巴駝主母爲米巴駝者父也米者母也若有過撻之則俯首受杖略不敢動其牝牡者自相配偶主人終無與之交接之理或唐人到彼久曠者不擇一與之接主人聞之次日不肯與同坐以其曾與野人接故也或與外人交至於有姪養子主人亦不詰問其所從來蓋以其所不齒且利其得子仍可爲異日奴婢也或有逃者擒而復得必於面刺以青或於項上帶鐵以錮之亦有帶於臂腿間者

語言

國中語言自成音聲雖近而占城暹人皆不通話說如以一爲梅二爲別三爲卑四爲般五爲孛監六爲孛監梅七爲孛監別八爲孛監卑九爲孛監般十爲答呼父爲巴駝叔伯亦呼爲巴駝呼母爲米姑姨嬸姆以至鄰人之尊年者亦呼爲米呼兄爲邦姊亦呼爲邦呼弟爲補溫呼舅爲吃賴姑夫亦呼爲孛賴大抵多以下字在上如言此人乃張三之弟則曰補溫張三彼人乃李四之舅則曰吃賴李四又如呼中國

爲備世呼官人爲巴丁呼秀才爲班詰乃呼中國官人不曰備世巴丁而曰巴丁備世呼中國之秀才不曰備世班詰而曰班詰備世大抵皆如此此其大略耳至若官府則有官府之議論秀才則有秀才之文談僧道自有僧道之語說城市村落言語各自不同亦與中國無異也

野人

野人有二種有一等通往來話言之野人乃賣與城間爲奴之類是也有一等不屬教化不通言語之野人此輩皆無家可居但領其家屬巡行於山頭戴一瓦盆而走遇有野獸以弧矢標槍射之而得乃擊火於石共烹食而去其性甚狠其藥甚毒同黨中常自相殺戮近地亦有種荳蔻木綿花織布爲業者布甚麤厚花紋甚別

文字

尋常文字及官府文書皆以麕鹿皮等物染黑隨其大小闊狹以意裁之用一等粉如中國白堊之類磋爲小條子其名爲梭拈於手中就皮畫以成字永不脫落用畢則插於耳之上字跡亦可辨認爲何人書寫須以濕物揩拭方去大率字樣正如回

鵠字凡文書皆自後書向前却不自上書下也余聞之也先海牙云其字母音聲正與蒙古音相鄰但所不同者三兩字耳初無印信人家告狀亦有書鋪書寫

正朔時序

每用中國十月爲正月是月也名爲佳得當國宮之前縛一大棚上可容千餘人盡掛燈毬花朵之屬其對岸遠離二十丈地則以木接續縛成高棚如造塔撲竿之狀可高二十餘丈每夜設三四座或五六座裝煙火爆杖於其上此皆諸屬郡及諸府第認直遇夜則請國主出觀點放煙火爆杖煙火雖百里之外皆見之爆杖其大如礮聲震一城其官屬貴戚每人分以巨燭檳榔所費甚夥國主亦請奉使觀焉如是者半月而後止每一月必有一事如四月則拋毬九月則壓獵壓獵者聚一國之衆皆來城中教閱於國宮之前五月則迎佛水聚一國遠近之佛皆送水與國主洗身陸地行舟國主登樓以觀七月則燒稻其時新稻已熟迎於南門外燒之以供佛婦女車象往觀者無數主卻不出八月則挨藍挨藍者舞也點差伎樂每日就國宮內挨藍且鬪猪鬪象國主亦請奉使觀焉如是者一旬其餘月分不能詳記也國人亦

有通天文者日月薄蝕皆能推算但是大小盡却與中國不同閏歲則彼亦必置閏但只閏九月殊不可曉一夜只分四更每七日一輪亦如中國所謂開閉建除之類番人既無名姓亦不記生日多有以所生日頭爲名者有兩日最吉三日平平四日最凶何日可出東方何日可出西方雖婦女皆能算之十二生肖亦與中國同但所呼之名異耳如以馬爲卜賽呼雞之聲爲欒呼猪之聲爲直盧呼牛爲個之類也

爭訟

民間爭訟雖小事亦必上聞國主初無笞杖之責但聞罰金而已其人大逆重事亦無絞斬之事止於城西門外掘地成坑納罪人於內實以土石堅築而罷其次有斬手足指者有去鼻者但姦與賭無禁姦婦之夫或知之則以兩柴絞姦夫之足痛不可忍竭其資而與之方可獲免然裝局欺騙者亦有之或有死於門首者則自用繩拖置城外野地初無所謂體究檢驗之事人家獲盜亦可施監禁拷掠之刑却有一項可取且如人家失物疑此人爲盜不肯招認遂以鍋煎油極熱令此人伸手於中若果偷物則手腐爛否則皮肉如故云番人有法如此又兩家爭訟莫辨曲直國官

之對岸有小石塔十二座令一人各坐一塔中其外兩家自以親屬互相隄防或坐一二日或三四日其無理者必獲證候而出或身上生瘡癩或咳嗽熱證之類有理者略無纖事以此剖判曲直謂之天獄蓋其土地之靈有如此也

病癩

國人尋常有病多是入水浸浴及頻頻洗頭便自痊可然多病癩者比比道途間土人雖與之同臥同食亦不校或謂彼中風土有此疾曾有國主患此疾故人不之嫌以愚意觀之往往好色之餘便入水澡洗故成此疾聞土人色慾纔畢皆入水澡洗其患痢者十死八九亦有貨藥於市者與中國不類不知其爲何物更有一等師巫之屬與人行持尤可笑

死亡

人死無棺止以簦席之類蓋之以布其出喪也前亦用旗幟鼓樂之屬又以兩杵炒米繞路拋撒擡至城外僻遠無人之地棄擲而去俟有鷹犬畜類來食頃刻而盡則謂父母有福故獲此報若不食或食而不盡反謂父母有罪而至此今亦漸有焚者

往往皆唐人之遺種也父母死別無服制男子則髡其髮女子則於纈門剪髮似錢大以此爲孝耳國主仍有塔葬埋但不知葬身與葬骨耳

耕種

大抵一歲中可三四番收種蓋四時常如五六月天且不識霜雪故也其地半年有雨半年絕無自四月至九月每日下雨午後方下淡水洋中水痕高可七八丈巨樹盡沒僅留一杪耳人家濱水而居者皆移入山後十月至三月點雨絕無洋中僅可通小舟深處不過三五尺人家又復移下耕種者指至何時稻熟是時水可滄至何處隨其地而播種之耕不用牛耒耜鎌鋤之器雖稍相類而制自不同又有一等野田不種常生水高至一丈而稻亦與之俱高想別一種也但糞田及種蔬皆不用穢嫌其不潔也唐人到彼皆不與之言及中國糞壅之事恐爲所鄙每三兩家共掘地爲一坑蓋其草滿則填之又別掘地爲之凡登溷既畢必入池洗淨止用左手右手留以拿飯見唐人登廁用紙揩拭者笑之甚至不欲其登門婦女亦有立而溺者可笑可笑

山川

自入真蒲以來率多平林叢味長江巨港綿亘數百里古樹修藤森陰蒙翳禽獸之聲逖雜其間至半港而始見有曠田絕無寸木彌望芄芄禾黍而已野牛以千百成羣聚於此地又有竹坡亦綿亘數百里其間竹節相間生刺筍味至苦四畔皆有高山

出產

山多異木無木處乃犀象屯聚養育之地珍禽奇獸不計其數細色有翠毛象牙犀角黃臘蠟色有降真荳蔻畫黃紫梗大風子油翡翠其得也頗難蓋叢林中有池池中有魚翡翠自林中飛出求魚番人以樹葉蔽身而坐水濱籠一雌以誘之手持小網伺其來則罩有一日獲三五隻有終日全不得者象牙則山僻人家有之每一象死方有二牙舊傳謂每歲一換牙者非也其牙以標而殺之者上也自死而隨時爲人所取者次之死於山中多年者斯爲下矣黃臘出於村落朽樹間其一種細腰蜂如螻蟻者番人取而得之每一船可收二三千塊每塊大者三四十斤小者亦不下

十八九斤犀角白而帶花者爲上黑爲下降眞生叢林中番人頗費砍斫之勞蓋此乃樹之心耳其外白木可厚八九寸小者亦不下四五寸荳蔻皆野人山上所種畫黃乃一等樹間之脂番人預先一年以刀斫樹滴瀝其脂至次年而始收紫梗生於一等樹枝間正如桑寄生之狀亦頗難得大風子油乃大樹之子狀如椰子而圓中有子數十枚胡椒間亦有之纏藤而生纍纍如綠草子其生而青者更辣

貿易

國人交易皆婦人能之所以唐人到彼必先納一婦人者兼亦利其能買賣故也每日一墟自卯至午卽罷無居鋪但以蓬席之類鋪於地間各有處聞亦有納官司貨地錢小交關則用米穀及唐貨次則用布若乃大交關則用金銀矣往往土人最朴見唐人頗加敬畏呼之爲佛見則伏地頂禮近亦有脫騙欺負唐人由去人之多故也

欲得唐貨

其地想不出金銀以唐人金銀爲第一五色輕練帛次之其次如眞州之錫鐵溫州

之漆盤泉州之青瓷器及水銀銀硃紙筭硫黃焰硝檀香白芷麝香麻布黃草布雨傘鐵鍋銅盤水珠桐油篋箕木梳針其麤重則如明州之蓆甚欲得者則菽麥也然不可將去耳

草木

惟石榴甘蔗荷花蓮藕芋桃蕉芎與中國同荔枝橘子狀雖同而酸其餘皆中國所未曾見樹木亦甚各別草花更多且香而豔水中之花更有多品皆不知其名至若桃李杏梅松栢杉檜梨棗楊柳桂蘭菊蕊之類皆所無也其中正月亦有荷花

飛鳥

禽有孔雀翡翠鸚鵡乃中國所無餘如鷹鴉鷺鶯雀兒鷓鴣鶴野鴨黃雀等物皆有之所無者喜鵲鴻鴈黃鶯杜宇燕鷓之屬

走獸

獸有犀象野牛山馬乃中國所無者其餘如虎豹熊羆野豬麋鹿驢鹿猿狐之類甚多所少者獅子猩猩駱駝耳鷄鴨牛馬猪羊所不在論也馬甚矮小牛甚多生敢騎

死不敢食亦不敢剝其皮聽其腐爛而已以其與人出力故也但以駕車耳在先無
鵝近有舟人自中國攜去故得其種鼠有大如猫者又有一等鼠頭腦絕類新生小
狗兒

蔬菜

蔬菜有蔥芥韭茄瓜西瓜冬瓜王瓜莧菜所無者蘿蔔生菜苦蕒菠薐之類瓜茄正
月間卽有之茄樹有經數年不除者木綿花樹高可過屋有十餘年不換者不識名
之菜甚多水中之菜亦多種

魚龍

魚鱉惟黑鯉魚最多其他如鯉鯽草魚最多有吐哺魚大者重二斤已上有不識名
之魚亦甚多此皆淡水洋中所來者至若海中之魚色色有之鱔魚湖鰻田雞土人
不食入夜則縱橫道途間鼃鼉大如合苙雖六藏之龜亦充食用查南之蝦重一斤
已上真蒲龜脚可長八九寸許鰐魚大者如船有四脚絕類龍特無角耳吐甚脆美
蛤蜊蝸螺之屬淡水洋中可捧而得獨不見蟹想亦有之而人不食耳

醞釀

酒有四等第一唐人呼爲蜜糖酒用藥麴以蜜及水中半爲之其次者土人呼爲朋牙四以樹葉爲之朋牙四者乃一等樹葉之名也又其次以米或以剩飯爲之名曰包稜角蓋包稜角者米也其下有糖鑑酒以糖爲之又入港濱水又有茭漿酒蓋有一等茭葉生於水濱其漿可以釀酒

鹽醋醬麪

鹺物國中無禁自眞蒲巴瀾濱海等處率皆燒山間更有一等石味勝於鹽可琢以成器土人不能爲醋羹中欲酸則著以咸平樹葉樹旣莢則用莢旣生子則用子亦不識合醬爲無麥與豆故也亦不曾造麴蓋以蜜水及樹葉釀酒所用者酒藥耳亦如鄉間白酒藥之狀

蠶桑

土人皆不事蠶桑婦人亦不曉針線縫補之事僅能織木綿布而已亦不能紡但以手理成條無機杼以織但以一頭縛腰一頭搭上梭亦止用一竹管近年暹人來居

卻以蠶桑爲業桑種蠶種皆自暹中來亦無麻苧惟有絡麻暹人卻以絲自織阜綾衣着暹婦卻能縫補土人打布損破皆倩其補之

器用

尋常人家房舍之外別無桌凳盂桶之類但作飯則用一瓦釜作羹又用一瓦鉢地埋三石爲竈以椰子殼爲杓盛飯用中國瓦盤或銅盤羹則用樹葉造一小碗雖盛汁亦不漏又以茭葉製一小杓用兜汁入口用畢則棄之雖祭祀神佛亦然又以一錫器或瓦器盛水於傍用以蘸手蓋飯只用手拏其粘於手非此水不能去也飲酒則用鐵注子貧人則固瓦鉢子若府第富室則一一用銀至有用金者國之慶賀多用金爲器皿制度形狀又別地下所鋪者明州之草席或有鋪虎豹麂鹿等皮及藤簞者近新置矮桌高尺許睡只竹席臥於板近又用矮床者往往皆唐人制作也食品用布罩國主內中以銷金縑帛爲之皆舶商所饋也稻不用礬止用杵舂碓耳

車轎

轎之制以一木屈其中兩頭豎起雕刻花樣以金銀裹之所謂金銀轎扛者此也每

頭一尺之內釘鉤子以大布一條厚摺用繩繫於兩頭鉤中人挽於布以兩人擡之
轎則又加一物如船篷而更闊飾以五色縑帛四人扛有隨轎而走若遠行亦有騎
象騎馬者亦有用車者車之制卻與他地一般馬無鞍象無凳可坐

舟楫

巨舟以硬樹破版爲之匠者無鋸但以斧鑿之開成版既費木且費工也凡要木成
段亦只以鑿鑿斷起屋亦然船亦用鐵釘上以茭葉蓋覆卻以檳榔木破片壓之此
船名爲新拏用櫂所粘之油魚油也所和之灰石灰也小舟卻以一巨木鑿成槽以
火熏輓用木撐開腹大兩頭尖無蓬可載數人止以櫂划之名爲皮闌

屬郡

屬郡九十餘曰眞蒲曰查南曰巴澗曰莫良曰八薛曰蒲買曰雉棍曰木津波曰賴
敢坑曰八廝里其餘不能悉記各置官屬皆以木排柵爲城

村落

每一村或有寺或有塔人家稍密亦自有鎮守之官名爲買節大路上自有歇息如

郵亭之類其名爲森木近與暹人交兵遂皆成曠地

取膽

前此於八月內取膽蓋占城王每年索人膽一甕萬千餘枚遇夜則多方令人於城中及村落去處遇有夜行者以繩兜住其頭用小刀於右脇下取去其膽俟數足以饋占城王獨不取唐人之膽蓋因一年取唐人一膽雜於其中遂致甕中之膽俱臭腐而不可用故也近年已除取膽之事另置取膽官屬居北門之裏

異事

東門之裏有蠻人淫其妹者皮肉相粘不開歷三日不食而俱死余鄉人薛氏居番三十五年矣渠謂兩見此事蓋其用聖佛之靈所以如此

澡浴

地苦炎熱每日非數次澡洗則不可過入夜亦不免一二次初無浴室孟桶之類但每家須有一池否則兩三家合一池不分男女皆裸形入池惟父母尊年在池則子女卑幼不敢入或卑幼先在池則尊長亦迴避之如行輩則無拘也但以左手遮其

牝門入水而已或三四日或五六日城中婦女三三五五咸至城外河中濼洗至河邊脫去所纏之布而入水會聚於河者動以千數雖府第婦女亦預焉略不以爲恥自踵至頂皆得而見之城外大河無日無之唐人暇日頗以此爲遊觀之樂聞亦有就水中偷期者水常溫如湯惟五更則微涼至日出則復溫矣

流寓

唐人之爲水手者利其國中不着衣裳且米糧易求婦女易得屋室易辦器用易足買賣易爲往往皆逃逸於彼

軍馬

軍馬亦是裸體跣足右手執標槍左手執戰牌別無所謂弓箭礮石甲冑之屬傳聞與暹人相攻皆驅百姓使戰往往亦別無智略謀畫

國主出入

聞在先國主轍迹未嘗離戶蓋亦防有不測之變也新主乃故國主之壻原以典兵爲職其婦翁愛女女密竊金劍以往其夫以故親子不得承襲嘗謀起兵爲新主所

覺斬其趾而安置於幽室新主身嵌聖鐵縱使刀箭之屬著體不能爲害因恃此遂敢出戶余宿留歲餘見其出者四五凡出時諸軍馬擁其前旗幟鼓樂踵其後宮女三五百花布花髻手執巨燭自成一隊雖白日亦照燭又有宮女皆執內中金銀器皿及文飾之具制度迥別不知其何所用又有宮女執標槍標牌爲內兵又成一隊又有羊車馬車皆以金爲飾其諸臣僚國戚皆騎象在前遠望紅涼傘不計其數又其次則國主之妻及妾媵或轎或車或馬或象其銷金涼傘何止百餘其後則是國主立於象上手持寶劍象之牙亦以金套之打銷金白涼傘凡二十餘柄其傘柄皆金爲之其四圍擁簇之象甚多又有軍馬護之若遊近處止用金轎子皆以宮女擡之大凡出入必迎小金塔金佛在其前觀者皆當跪地頂禮名爲三罷不然則爲貌事者所擒不虛釋也每日國主兩次坐衙治事亦無定文及諸臣與百姓之欲見國主者皆列坐地上以俟少頃間內中隱隱有樂聲在外方吹螺以迎之聞止用金車子來處稍遠須臾見二宮女纖手捲簾而國主乃仗劍立於金窗之中矣臣僚以下皆合掌叩頭螺聲方絕乃許擡頭國主特隨亦就坐坐處有獅子皮一領乃傳國之

寶言事既畢國王尋卽轉身一宮女復垂其簾諸人各起以此觀之則雖蠻貊之邦未嘗不知有君也

眞臘風土記終

欽定四庫全書提要

北戶錄三卷

唐段公路撰學海類編作公路蓋字之僞新唐書藝文志稱爲宰相文昌之孫則當爲臨淄人學海類編作東牟人亦未詳所本歷仕始末不可考惟據書首結銜知官京兆萬年縣尉據書中稱咸通十年知爲懿宗時人而已是書當在廣州時作載嶺南風土頗爲賅備而於物產爲尤詳其徵引亦極博洽如淮南萬畢術廣志南越志南裔異物會要靈枝圖記陳藏器本草唐韻郭緣生述征記臨海異物志陶朱公養魚經名苑毛詩義船神記字林廣州記扶南傳諸書今皆散佚藉此得以略見一二卽所引張華博物志多今本所無亦藉此以考證眞僞條下註文頗爲典贍題登仕郎前參軍龜圖撰不題其姓似爲公路之族然唐書宰相世系表不載其名莫知其審矣唐書

藝文志作北戶雜錄疑傳寫誤衍一雜字其作三卷與此本合學海類編所載惟存一卷凡物產五十一條不爲完本曹溶所錄古書往往如是不足深詰也

古今說海

北戶錄目錄

通犀

鸚鵡瘡

蝮蛇牙

紅蟹殼

金龜子

水母

紅蝦盃

雞骨卜

桃椰炙

睡菜

斑皮竹筍

孔煤雀

赤日吉了

紅蛇

蛭蝶枝

乳穴魚

蚊母扇

雞毛筆

象鼻炙

紅鹽

水韭

無核荔枝

鷓鴣

緋猿

蛤蚧

紅蝙蝠

魚種

鵝毛被

雞卵卜

鵝毛脰

米麩

薤菜

變柑

橄欖子

山橘子

山胡桃

白楊梅

偏核桃

紅梅

五色藤筵蹄

香皮紙

抱木屨

紅藤簾

方竹杖

山花燕脂

鶴子草

越王竹

無名花

指甲花

相思子

睡蓮

目錄終

古今說海

北戶錄

通犀

通犀置大霧重露下終不霑濡又堪辨毒藥酒藥酒生沫若貯米飼鷄鷄見輒驚散一呼爲駭鷄犀或中毒箭刺於創中立愈蓋犀食百毒棘刺故也

孔雀媒

雷羅數州收孔雀雛養之使極馴擾致於山野間以物絆足傍施羅網伺野孔雀至則倒網掩之無遺一證孔雀不匹偶但音影相接便有孕如白鷓雌雄相視則孕或曰雄鳴上風雌鳴下風亦孕見博物志宋紀曰孝武大明五年有獻白孔雀爲瑞者愚按說文曰率鳥者繫生鳥以來之名曰鬮字林音由今獵師有鬮也淮南萬畢術曰鷓鴣致鳥注云取鷓鴣拆其大羽絆其兩足以爲媒博物志又云鷓鴣一名鷓鴣

鷓鴣

衡州南靈鷓鴣解嶺南野葛諸菌毒及辟溫瘴又一名鷓鴣音述多對啼廣志言鷓鴣鳴

說選十六 偏記十三

云但南不北古今注云其鳴自呼南越志云其鳴自號杜薄州食之亡厲惟本草說

鳴云鈎輶格磔

竹客反

鸚鵡瘴

廣之南新勤春十州呼爲南道多鸚鵡凡養之俗忌以手頻觸其背犯者卽多病顛而卒土人謂爲鸚鵡瘴愚親驗之

赤白吉了

普甯有廉州民獲赤白吉了各一頭獻於刺史者其赤者尋卒白者久而能言

緋猿

公路咸通十年往高涼程次青山鎮其山多猿有黃緋者緋者絕大毛彩殷鮮真謂奇獸夫猿則狙獼猱狀之類其色多傳青白玄黃而已今則豈可窮其族類與其猿能伏鼠多羣行猿善啼者其音淒入肝脾方知當一部鼓吹豈獨鼉聲然哉

蟒蛇牙

蟒蛇大者長十餘丈圍可七八尺多在樹上候麋鹿過者吸而吞之至鹿消卽纏大

樹上出其頭角乃不復動夷人伺之以竹籤籤煞之取其膽也故南裔異物志曰蝮蛇牙長六七寸土人尤重之云辟不祥利遠行賣一枚直牛數頭

紅蛇

公路至雷州對岸倚舟候風勢見羣小兒簇二巨蛇各長丈餘一如孔雀尾毛色金翠奪目一如真紅色鮮明若血又有十餘頭白蛇前後相次若導從俱入一榕藤窠內竟不復去故知蛇有草木水土四種其類不可窮也又歸化縣有兩頭蛇南越志云無毒夷人餌之兼名苑云兩頭蛇一名越王約髮俗占見之不祥然論衡引楚相孫叔敖事者何也會叢又云渾夕之山有蛇一首兩身名曰肥遺見則大旱管子曰固水之精名曰螭音威一頭兩身以其名呼之可使取魚鼈

蛤蚧

蛤蚧首如蟾蜍背綠色上有黃斑點若古錦文長尺餘尾絕短其族則守宮蜥蜴蝮蛇多居古木竅間自呼其名聲絕大又有十二時亦其類也大者一尺尾長於身傳云自旦至暮變十二般色傷人必死愚嘗獲一枚閉於籠中玩之止見變黃褐赤黑

四色

紅蟹殼

儋州出紅蟹大小殼上多作十二點深臙脂色其殼與虎蟹堪作疊子按蟹一名蜃
音廣雅云雄曰蜃雌曰博帶抱朴子又云山中辰日稱無腸公子蟹也古今注云
小蟹一名長鄉廣志云鋪音小蟹大如貨錢又蟹奴如榆莢在其腹中生死不相離
山海經載千里蟹洞冥記有貢百足蟹長九尺四螯者今恩州又出石蟹

蛺蝶枝

公路南行歷懸藤峽維舟飲水觀巖側有一木五綵初謂丹青之樹因命僮僕采之
頃獲一枝尙綴軟蝶凡二十餘個有翠紺縷者金眼者丁香眼者紫斑眼黑花者黃
白者緋脉者大如蝙蝠者小如榆莢者愚因登岸視乃知木葉化焉是知蝶生江南
柑橘樹蠹變爲蛺蝶鳥足之葉爲蝴蝶皆造化殆然非虛語也又會要云大食國西
鄰大海嘗遣人乘船經八年未極西岸中有一方石石上有樹榦赤葉青樹生小兒
長六七寸見人皆笑動其手脚若着樹枝其使摘取一枝小兒卽死異苑大元中汝

南人入山伐木見一竹中央蛇形已成上枝葉如故吳郡桐廬民嘗伐余遺竹一宿見雉頭頸盡就身猶未化此亦竹爲蛇蛇爲雉也

紅蝙蝠

紅蝙蝠出隴州皆深紅色惟翼脉淺黑多雙伏紅蕉花間採者若獲其一則一不去南人收爲媚藥王子年拾遺云有五色蝙蝠異物志鼯蝨魚因風入空木而化爲蝙蝠靈枝圖說曰蝙蝠服之壽萬歲又媚藥載顛金鳥辟寒金龍子布穀脚脛骨鵲腦砂稜莖草芍草左行草獨未見錄紅蝙蝠處豈闕載乎又有無風獨搖草男女帶之相媚又陳藏器云榼子蔓生取子中仁帶於衣令人有媚多迷人

金龜子

金龜甲蟲也五六月生於草蔓上大於榆莢細視真金帖龜子行則成雙其蟲死金色隨滅如螢光也南人收以養粉云與養粉相宜

乳穴魚

全義之西南有山曰盤龍山有乳洞乳洞有金沙龍盤魚皆四足修尾丹腹狀若守

宮游泳水濱人莫敢犯按御覽云龍蟠山有石洞洞中小水水有四足魚皆如龍形人殺之卽風雨也然唐韻云鰓魚各四足山海經云人魚如鱗音魚四脚出丹洛二

水有鮓大者謂之鮓音爾雅注鮓似鮓四足聲似小兒但未見言其可致風雨耳公

路因思道書說五頭魚三足鹿皆神化所致不可以類而推也若以魚之異者則澧

水之魚名朱鼈六足有珠又歷湖潭有五色魚又丹水出丹魚割肉以塗足下則可

步履水上又朔法師云紫音魚一首十身博物志云金魚腦中有麩金出功婆塞江

又吳王食膾有餘棄江中爲魚今名吳王鱠餘者長數寸又魏武四時食制曰望魚

側如刀可以割草出豫章白髮魚戴髮形如婦人白肥無鱗出滇池又郭延生述證

記曰城陽縣南堯母慶都墓廟前一池魚頭間有印文謂之印頰魚非告祠者捕不

得又臨海異物志云鰓魚如指長七八寸但有脊骨曝作燭極有光明又比目魚一

名鰓音一名鰓沈懷遠南越志謂之板魚亦曰左介介亦作鮓吳都賦云雙則比目

片則十餘異物志南方鏡魚圓如鏡也又異苑云鮓音魚凡諸魚欲產鮓魚輒以頭

衝其腹世謂衆魚之生母又臨海水土異物志鹿魚頭上有兩角如鹿又云鮓音

反音蒸

魚腹背有刺如三角菱又神異經黃公魚長七八尺狀如醴魚以烏梅二七煮之卽熟食之無鯁

魚種

南海諸郡人至八九月於池塘間采魚子著草上懸於竈煙上至二月春雷發時卻收草浸於池塘間旬月內如蝦蟇子狀鬻於市號魚種育池塘間一年內可供口腹也愚按陶朱公養魚經曰朱公謂威王治生之法有五水畜第一水畜魚也又拂林國有羊羔生於土中然其臍與地連割之則死惟人著甲走馬擊鼓駭之其羔驚鳴而臍絕便逐逐矣博物志云取鼈剉如棋搗赤莧汁和令厚以茅包之六月中投於池澤間經旬纒纒成鼈也

水母

水母一名蚌一名石鏡南人治而食之云性熱偏療河魚疾也

蚊母扇

端新州有鳥類青鯢而嘴大常在池塘間捕魚而食每作一聲則有蚊子羣出其口

按小雅曰顛鳥似烏而大廣志云蚊母此鳥吐出蚊也土人云其翅堪爲扇惟辟蚊子與陳藏器說同又云塞北有蟲母草嶺南蟲母木南越志云古度樹一呼那子南人號曰柁日亞反不華而實實從木皮中出如綴珠璫其實大如櫻桃黃卽可食過則實中化蛾飛出亦有爲蚊子者

鵝毛被

鵝毛被邕之南有酋豪多熟鵝毛爲被如稻畦衲之其溫輒不下綿絮也

紅蝦盃

紅蝦出潮州潘州南邑縣大者長二尺土人多理爲盃王子年拾遺云大蝦長一尺鬚爲可簪洞冥記載鬚杖兼名苑云廣州獻蝦頭盃簡文將盛酒無故自躍乃不復用愚又按毛詩義具大者有一尺六七寸今九真交趾以爲盃盤實奇物也

鷄毛筆

番禺諸郡多以青羊毫爲筆韶州擇鷄毛爲筆亦有圓如錐方如鑿可抄寫細字者昔溪源有鴨毛筆以山雞毛雀雉毛間之五色可愛筆有豐狐之毫博子云虎僕

漢末筆

虎僕

之毛博物似豹 狗蛉鼠毛廣志可 鼠鬚均州 殺羆羊毛邛州取 麝毛狸毛 鄭

云狸毛鹿毛 馬毛羊鬚 鼎陶隱居 燒丹封胎髮 慶云蕭祭酒常用之 鄭龍筋拾遺

為之然未若兔毫

雞卵卜

邕州之南有善行術者取雞卵墨畫祝而煮之剖為二片以驗其黃然後決嫌疑定禍福言如響答據此乃古法也神仙傳曰人有病就茅君請福煮鷄子十枚以內帳中須臾茅君擲出中無黃者病多愈有黃者不愈常以此為候愚又見卜者流雜書傳虎卜紫姑卜牛蹄卜灼骨卜鳥卜雖不法於著龜亦有可稱者

鷄骨卜

南方逐除夜及將發船皆殺鷄擇骨為卜傳古法也卜占即以肉祀船神呼為孟公孟姥其來尚矣按梁簡文船神記云船神名馮耳五行書云下船三拜三呼其名除百忌又呼為孟公孟姥劉思真云玄冥為水官死為水神冥孟聲相似又云孟公父名憤母名衣孟姥父名板母云履或云冥父冥姥因玄冥也

象鼻炙

廣之屬城循州雷州皆產黑象牙小而紅土人捕之爭食其鼻云肥脆偏堪爲炙愚按象有十二肉陳藏器云惟鼻是其本肉諸卽雜肉梁翹法師云象一名伽那古訓云象孕子五歲始生

鵝毛脰

恩州出鵝毛脰乃鹽藏其味絕美其細如針郭義恭云小魚一斤千頭未之過也

榔梳炙

檳榔莖葉與波斯棗古散古散堪爲拄杖椰子檳榔小異其木如莎樹皮釀木皮出麪可

食洛陽伽藍記云昭儀寺有酒樹麪木得非梳榔乎其心爲炙滋腴極美

紅鹽

恩州有鹽場色如絳雪驗之卽由煎時染成差可愛也鄭公虔云琴湖池桃花鹽色如桃花隨月盈縮在張掖西北按鹽有赤鹽紫鹽黑鹽青鹽黃鹽亦有如虎如印如繖如石如水精狀者

米粦

廣州南尚米粦合生熟粉爲之白薄而軟按劉孝威謝官賜交州米粦四百屈詳其

言屈豈今之數乎且前朝短書雜說有呼食爲頭

晉元帝謝賜功德淨饌一頭又謝齋功德食一頭又劉孝

威謝賜果食一頭

以魚爲斗

梁科律生魚若干斗

茗爲薄爲夾

溫貢茗二百尺薄又梁筆爲科律薄茗千夾云云

雙爲床爲枝

搜神記益州西神祠祈禱者持

床梁簡文帝答書云乍置筆床又云寫書南朝呼筆四管爲一

雙筆南朝呼筆四管爲一

墨爲螺爲丸爲枚

陸云以兄送墨二螺梁科律御墨一量十二枚小墨一枚

陸倕謝安城王楚越衣二

爲番錦爲兩

王佐云幣錦二兩

衣爲裁

陸倕謝安城王楚越衣二

袈裟爲緣

簡文

蒙惠袈裟一緣

奴爲頭

簡文帝書言安城

麝爲子蠟爲粦

麝香如千子蠟如千

榔爲口胡桃爲子

陸倕謝安成王賜檳榔一千口并胡桃一千子

其事不可備論

睡菜

睡菜五六月生田塘中菜類茨菰根如藕梢土人採根爲鹽菹或云食之好睡郭子

橫云五味草食之不使人睡亦名卻睡草

水韭

水韭生於池塘中葉似韭得非龍爪薤乎字林云簽音嚴水中野韭也又啉音吟見字林似蒜生水中

薤菜

薤菜葉如柳三月生陳藏器云主解胡蔓草毒胡蔓即野葛也愚按廣之菜有掉辛也東風味如酪香蕊音戢蜀人莠音莠莠也之類無足奇者吳志孫皓時有賣音買菜晉安帝義熙二年有苦蕒菜生揚州國初建達國獻佛土菜泥婆國獻波稜菜

斑皮竹筍

湘源縣十二月食斑皮竹筍諸筍無以及之吳錄云馬援至荔浦見冬筍名曰苞筍博物志曰斑皮竹堯女以涕揮竹竹盡斑也爾雅曰筍竹之萌說文曰筍竹胎詩疏義筍皆四月生巴竹筍生八月簞音媚竹筍冬夏生永嘉記含墮竹筍六月生愚按山海經竹生花其年便枯六十年一易根必結實而枯死實落土復生六年還成町也竹譜曰蔣必六十年復亦六年是也南中有以竹為刀錯子者如少鈍復以漿水洗之如初廣州記云石林竹勁利削為刀切截象皮如截草也愚聞貞元五年番禺有

海戶犯鹽禁避罪羅浮山入至第十三嶺遇巨竹百丈萬竿竹圍二十一尺有三十
九節節長二丈海戶因破之爲篋會罷吏捕逐遂挈而歸時有軍人獲一篋以爲奇
貨後獻於刺史李復復命陸子羽圖而記之許氏說文有長節竹謂之筮音鍾得非羅
浮山龍鍾之義乎

無核荔枝

南方果之美者有荔枝梧州火山者夏初先熟而味少劣其高潘者最佳五六月方
熟有無核類鷄卵大者其肪瑩白不減水精性熱液甘乃奇實也

變柑

新州出變柑有苞大於升者且皮薄如洞庭之橘餘柑之所弗及傳云移植不數百
里形味俱變因以爲名亦如踰淮爲枳乃水土異也

橄欖子

八九月熟其大如棗廣志云有大如鷄子者有野生者高不可梯但刻其根方數寸
許入鹽於中子皆落矣今高涼有銀坑橄欖子細長味美於諸郡產者其價亦貴陳

藏器云其木止鯢魚毒此木作櫟撥著鯢魚皆浮出

山橋子

冬熟有大如土瓜者次如彈丸者皮薄下氣普甯多有之

山胡桃

山胡桃皮厚底平狀如檳榔

白楊梅

楊梅葉如龍眼樹冬青一名_{枕音}潘州有白色者甜而絕大

偏核桃

占卑國出偏核桃形如半月狀波斯人取食之絕香美

紅梅

嶺南之梅小於江左居人采之雜以朱槿花和鹽曝之梅爲槿花所染其色可愛又有選大梅刻鏤瓶罐結帶之類取棹汁漬之棹木葉汁亦甚甘脆

五色藤筌蹄

瓊州出五色藤合子書囊之類細於錦綺亦藤工之妙手也新州作五色藤筌臺皆一時之精絕者梁劉孝儀謝太子五色藤筌蹄一枚云炎州采藤麗窮綺樽得非筌臺與蹄語訛歟

香皮紙

羅州多筌香樹身如柅柳皮堪搗紙土人號爲香皮紙

抱木屨

抱木產水中葉細如檜其身堅類栢惟根輒不勝刀鋸今潮州新州多剗之爲屨

紅藤簞

瓊州出紅簞一呼爲笙或謂之蘧蔭亦謂之行唐其色殷紅瑩而不垢

方竹杖

澄州產方竹體如削成勁挺堪爲杖亦不讓張騫筇竹杖也其隔州亦出大者數丈又海晏地名出蘆堪爲拄杖高潘州出千歲蕨拄杖之類具多更有疎節竹五六尺一節僧

道多以爲杖又按 最云溱州通竹直上無節空心也

山花燕脂

山花叢生端州山嶼間多有之其葉類藍其花似蓼正月開花土人採含苞者賣之用爲燕脂粉或時染帛其紅不下紅藍又鄭公虔云石榴花堪作燕脂

鶴子草

鶴子草蔓花也當夏開南人云是媚草甚神可比懷子夢芝采之曝乾以代面靨形如飛鶴狀翅羽嘴距無不畢備亦草之奇者草蔓延春生雙蟲常食其葉土人收於匳粉間餉之如養蠶諸蟲老不食而蛻爲蝶女子佩之如細鳥皮號爲細蝶郭子橫記勒畢獻細鳥以方尺玉籠盛數百形大如蠅狀如鸚鵡聲聞數百里間如黃鶻也國人以此爲候日晷亦曰候日蟲帝得之旬日飛盡明年有細鳥集於帷帟或襲人衣袖因名禪衣宮內嬪御有鳥集其衣者輒蒙愛幸至武帝末稍稍自死人服其皮者多爲丈夫所媚余訪花子事如面光眉翠月黃星靨其來尙矣然事有相類者見拾遺引孫和悅鄧夫人嘗置膝上和月下舞水晶如意誤傷夫人頰流血染袴和自舐瘡太醫曰齧髓雜玉及琥珀屑當滅痕和乃作膏琥珀太多痕未滅而頰有赤點

細視之更益其妍諸嬖要寵者以丹青點頰而後進幸一說上官昭容自製花子以掩黯處

越王竹

嚴州產越王竹根於石上狀若荻枝高尺餘土人用代酒籌次有沙筋產於海島間其心若骨可爲籌筋凡欲采者須輕步從之不爾聞人行聲則縮入沙中不可取陳藏器云越王餘算味鹹生南海長尺許

無名花

廣州之南數百里有蔓草生吐一葉白花片大如掌初夏開徧問土人莫有知者

指甲花

花細白絕芳香番人重之未詳其名又卽恙弭花白茉莉花

紅者不香

皆波斯移植夏中

如金錢花也本出外國大同二年始來中土又扶南傳曰頓遜國有區撥花葉逆花致祭花摩夷花唐初劉賓國獻俱佛頭花伽失不國獻泥樓鉢羅花皆中國所無者

相思子

相思子有蔓生者與龍腦相宜能令香不耗干寶搜神記云大夫韓馮妻美宋康王奪之馮自殺妻自投臺下死王怒令冢相望宿昔有文梓木生二塚之端根交於下枝錯其上宋王哀之因號其木曰相思樹

睡蓮

睡蓮葉如荇而大沉於水面其花布葉數重凡五種色當夏晝開夜縮入水底晝復出也與夢草晝入地夜卽復出一何背哉

欽定四庫全書提要

西使記一卷

元劉郁撰郁真定人是書記常德西使皇弟錫里庫軍中往返道途之所見王惲嘗載入玉堂雜記中此蓋別行之本也元史憲宗紀二年壬子秋遣錫喇征西域蘇丹諸國是歲錫喇薨三年癸丑夏六月命諸王錫里庫及烏蘭哈達帥師征西域法勒噶巴哈台等國八年戊午錫里庫討回回法勒噶巴平之擒其王遣使來獻捷考世系表睿宗十一子次六曰錫里庫而諸王中別無錫喇郭侃傳侃壬子從錫里庫西行與此記所云壬子歲皇弟錫喇統諸軍奉詔西征凡六年拓境幾萬里者相合然則錫喇卽錫里庫因元史爲明代所修故譯音譌舛一以爲錫喇一以爲錫里庫誤分二人而憲宗紀二年書錫喇薨三年重書錫里庫西征遂相承誤載也此記言常德西使在

已未正月蓋錫里庫獻捷之明年所記雖但據見聞不能考證古蹟然亦時有異聞郭侃傳所載與此略同惟譯語時有譌異耳我

皇上神武奮揚戡定西域崑崙月蝕盡入版圖計常德所經今皆在屯田列障之內業已

欽定西域圖志昭示億齡郁所紀錄本不足道然據其所述亦足參稽道里考證古今之異同故仍錄而存之也

古今說海

西使記

說選十七偏記十四

壬子歲皇弟旭烈統諸軍奉詔西征凡六年拓境幾萬里己未正月甲子常德

字仁卿

馳驛西覲自和林出兀孫中西北行二百餘里地漸高入站經瀚海地極高寒雖暑酷雪不消山石皆松文西南七日過瀚海行三百里地漸下有河闊數里曰昏木輦夏漲以舟楫濟數日過龍骨河復西北行與別失八里南以相直近五百里多漢民有二麥黍穀河西注瀦爲海約千餘里曰乞則里八寺多魚可食有礮磴亦以水激之行漸西有城曰業騰又西南行過孛羅城所種皆麥稻山多栢不能株絡石而長城居肆圉間錯土屋牕戶皆琉璃城北有海鐵山風出往往吹行人墮海中西南行二十里有關曰鐵木兒懺察守關者皆漢民關徑崎嶇似棧道出關至阿里麻里城市井皆流水交貫有諸果唯瓜葡萄石榴最佳回紇與漢民雜居其俗漸染頗似中國又南有赤木兒城居民多并汾人有獸似虎毛厚金色無文善傷人有蟲如蛛毒中人則煩渴飲水立死惟過醉葡萄酒吐則解有噶酒孛羅城迤西金銀銅爲錢有

文而無孔方至麻阿中以馬捧拖床遞鋪負重而行疾或曰乞里乞四易馬以犬二月二十四日過亦堵兩山間土平民夥溝洫映帶多故壘壞垣問之蓋契丹故居也計其地去和林萬五千里而近有河曰亦運流洶洶東注土人云此黃河也二十八日過塔刺寺三月一日過賽藍城有浮圖諸回紇祈拜之所三日過別石蘭諸回紇貿易如上已節四日過忽章河渡船如弓鞋然土人云河源出南大山地多產玉疑爲崑崙山以西多龜蛇行相雜郵亭客舍茲如浴室門戶皆以琉璃飾之民賦歲止輸金錢十文然貧富有差八日過梲思干城大而民繁時羣花正開唯梨花薔薇玫瑰如中國餘多不能名城之西所植皆葡萄稷稻有麥亦秋種滿地產藥十數種皆中國所無藥物療疾甚效曰阿只兒狀如苦參治馬鼠瘡婦人損胎及打撲內損用豆許嚙之自消曰阿息兒狀如地骨皮治婦人產後衣不下又治金瘡膿不出嚼碎傅瘡上卽出曰奴哥撒兒形似桔梗治金瘡及腸與筋斷者嚼碎傅之自續餘不能盡錄十四日過暗不河夏不雨秋則雨溉田以水地多蝗有鳥飛食之十九日過里丑城其地有桑棗征西奧魯屯駐於此二十六日過馬蘭城又過納商城草皆苜蓿

藩籬以栢二十九日過帶埽兒城滿山皆鹽如水晶狀近西南六七里新得國曰木乃奚牛皆駝峯黑色地無水土人隔山嶺鑿井相沿數十里下通流以溉田所屬山城三百六十已而皆下惟檐寒西一山城名乞都不孤峯峻絕不能矢石丙辰年王師至城下城絕高險仰視之帽爲墜諸道並進敵大驚令相大者納失兒來納款已而兀魯兀乃算灘出降算灘猶國王也其父領兵別據山城令其子取之七日而陷金玉寶物甚多一帶直銀千笏者其國兵皆刺客俗見男子勇壯者以利誘之令手刃父兄然後充兵醉酒扶入窟室娛以音樂美女縱其欲數日復置故處既醒問其所見教之能爲刺客死則享福如此因授以經呪日誦蓋使蠱其心志死無悔也令潛使未服之國必刺其主而後已雖婦人亦然其木乃奚在西域中最爲兇悍威脅鄰國霸四十餘年王師既克誅之無遺類四月六日過訖立兒城所產蛇皆四跖長五尺餘首黑身黃皮如鯊魚口吐紫艷過阿刺丁城馮哨蒼兒人被髮率以紅帕勒首衣青如鬼然王師自入西域降者幾三十國有佛國名乞石迷西在印毒西北蓋傳釋迦氏衣鉢者其人儀狀甚古如世所繪達摩像不茹葷酒日啖粳一合所談

皆佛法禪定至暮方語丁巳歲取報達國南北二千里其王曰合法里其城有東西城中有大河西城無壁壘東城固之以甃繪其上甚盛王師至城下一交戰破勝兵四十餘萬西城陷皆盡屠其民尋圍東城六日而破死者以數十萬合法里以舸走獲焉其國俗富庶爲西域冠宮殿皆以沉檀烏木降眞爲之壁皆以黑白玉爲之金珠珍寶不可勝計其妃后皆漢人所產大珠曰太歲彈蘭石瑟瑟金剛鑽之類帶有直千金者其國六百餘年傳四十主至合法里而亡人物頗秀於諸國所產馬名脫必察合法里不悅以橙漿和糖爲飲琵琶三十六絃初合法里患頭痛醫不能治一伶人作新琵琶七十二絃聽之立解土人相傳報達諸胡之祖故諸胡皆臣服報達之西馬行二十日有天房內有天使神胡之祖葬所也師名癖顏八兒房中懸鐵絙以手捫之心誠可及不誠者竟不得捫經文甚多皆癖顏八兒所作轄大城數十其民富實西有密乞兒國尤富地產金入夜視有光處誌之以灰翼日發之有大如棗者至報達六千餘里國西卽海海西有富浪國婦人衣冠如世所畫菩薩狀男子胡服皆善寢不去衣雖夫婦亦異處有大鳥駝蹄蒼色鼓翅而行高丈餘食火其如升

許其失羅子國出珠珍其王名喚思阿塔卑云西南海也採珠盛以革囊止露兩手腰絙石墜入海手取蚌并泥沙貯於囊中遇惡蟲以醋噴之卽去旣得蚌滿囊撼絙舟人引出之往往有死者印毒國去中國最近軍民一千二百萬戶所出細藥大胡桃珠寶烏木雞舌寶鐵諸物國中懸大鐘有訴者擊之司鐘者紀其事及時王官亦紀其名以防姦欺民居以蒲爲屋夏大熱人處水中己未年七月兀林國阿早丁算灘來降城大小一百二十民一百七十萬山產銀黑契丹國名乞里彎王名忽教馬丁算灘聞王大賢亦來降其拔里寺大城獅子雄者鬚尾如纓拂傷人吼則聲從腹中出馬聞之怖溺血狼有鬚孔雀如中國畫者惟尾在翅內每日中振羽香猫似土豹糞溺皆香如麝鸚鵡多五色風駝急使乘日可千里鶉鴿傳日亦千里珊瑚出西南海取以鐵網高有至三尺者蘭赤生西南海山石中有五色鴨思價最高金剛鑽出印毒以肉投大澗底飛鳥食其肉糞中得之撒入兒出西海中蓋瑋瑋之遺精蛟魚食之吐出年深結成價如金其假者卽犀牛糞爲之也骨篤犀大蛇之角也解諸毒龍種馬出西海中有鱗角牝馬有駒不敢同牧被引入海不復出阜鵬一產三卵

內一卵生犬灰色而毛短隨母影而走所逐禽無不獲者羶種羊出西海以羊臍種土中漑以水聞雷而生臍系地中及長驚以木臍斷便行嚙草至秋可食臍內復有種又一胡婦解馬語卽知吉凶甚驗其怪異等事不可殫紀往返凡一十四月郁款曰西域之開始自張騫其土地山川固在也然世代浸遠國號變易事亦難考今之所謂瀚海者卽古金山也印毒卽漢身毒也曰駝鳥者卽安息所產大馬爵也密昔兒卽唐拂菻地也觀其土產風俗可知已又新唐書載拂菻去京師四萬里在西海上所產珍異之物與今日地里正同蓋無疑也中統四年三月劉郁記

古今說海

北轅錄

說選十八 偏記十五

溥熙丙申十一月二十九日詔待制敷文閣張子政假試戶部尙書充賀金國生辰使皇叔祖右監門衛大將軍士褒假明州觀察使知東上閣門兼客省四方館事副之明年正月七日陞辭出國門初九日離行在二十一日至淮陰二十六日燕館習儀二十八日北行引接傳御使副卽館坐受其謁上中節序立其傍虜遣接伴使昭武大將軍尙書戶部郎中李侂廣威將軍尙書兵部員外郎完顏宗卞撰賓立飲引接三盃而退二十九日盱眙置酒餞使介度淮午至泗州津亭使副望拜如儀接伴戎服陪立各帶銀牌牌樣如方響上有番書急速走遞四字上有御押其狀如主字虜法出使皆帶牌有金銀木之別朝服對立於庭至展起居狀三節人講參禮使副陞廳茶酒三行虜法先湯後茶少頃聯轡入城夾道甲士執兵直抵於館旋供晚食果釘如南方齋筵先設茶筵一般若七夕乞巧其瓦壠桂皮雞腸銀錠金剛鐲西施舌取其形蜜和麪油煎之虜甚珍此

茶食謂未行酒先設此品
進茶一盞又謂之茶筵

次供饅頭血羹

畢羅肚羹盪羊餅子解粥肉齋羹索麪骨頭盤子自後大同小異酒味甚漓食畢卽鎖門內外不通二月一日甫交睫間接伴所晨衙三節謂北家聲喏各相呼而起時猶未至三鼓旋覓盃水洗漱冠櫛畢點心已至灌肺油餅棗糕麪粥有供糕糜處或未暇舉筋忽一人呼官員認馬三節出門馬已預定上一上二貼於背上以防差誤馬科於民謂之戶馬御者不俟據鞍卽散蓋防輿之話言泄穢事也細車四輛奉南北使副亦以序行車之形製既不美觀出館各有細紗二燭籠爲導氣象甚不佳亦有羌管從後聲頓懷怨永夜修途行人爲之感愴車每輛用驢十五頭把車五六人行差遲以巨挺擊驢謂之走車其震蕩如逆風上下波濤間轟車三十六輛每輛輓以四牛禮物私覲使介三節行李皆在焉自起程至三許折車

真定
燕山也
汴京

蓋常先

一兩程而往來人夫及輓車牛驢至州縣更易六十里至臨淮縣縣有徐城本徐國有徐君墓季札掛劍處卽此是日行循汴河河水極淺洛口卽塞理固應然承平漕江淮米六百萬石自揚子達京師不過四十日五十年後乃成污渠可寓一笑隋隄之柳無復彷彿矣二日至虹縣晚宿靈璧縣汴河自此斷流自過泗地皆荒瘠兩岸

奇石可愛

石產於縣鳳凰山以小爲貴

或云花石綱所棄者虞姬墓在西岸雖無碑却有村曠

名陰陵靈璧舊爲鎮亦名獻齒頭虹本紅陽夏二縣地漢書紅陽侯立是也訛而不改遂名曰虹五日至永城縣縣本敬丘縣地漢更敬丘曰太丘陳寔爲之長縣北有芒山與陽山相接六日至穀熟縣十八里至南京入陽熙門市樓榜曰睢陽夾道甲兵甚盛張巡許遠廟在西門外謂之雙忠廟其傍則宋玉臺此地高辛氏子闕伯所居商丘也武王封微子杞爲宋國後唐號歸德軍本朝王業所基陞爲南京詔卽衙城以爲大內以歸德爲名後陞應天府太上皇於此登位虜今改歸德府及門數妓來迓北使率皆騎驢不約束步武便乘騎也入境男子衣皆小窄婦女衫皆極寬大有位者便服立止用阜紵絲或番羅繫版繵與阜隸略無分別繵反挿垂頭於腰謂之有禮無貴賤皆著尖頭靴所頂之巾謂之踢鴟七日至甯陵縣縣本甯城古葛伯國六國時屬魏爲信陵君無忌之封宿拱州襄陵驛虜改曰濰州濰河在十里外本襄邑縣宋襄公葬於此故曰襄陵八日至雍丘縣縣故杞國武王封禹後東樓公縣東有葵丘齊桓公所會也行二十里過空桑伊尹所生之地又里許卽伊尹墓地

名三家次過范郎廟其地名孟莊廟塑孟姜女偶坐配享者蒙恬將軍也又六十里至陳留縣縣本鄭邑爲陳所并故名實張良之封邑或云陳思王亦生於此九日至東京虜改曰南京未到城先過皇城寺宜春苑使副易朝服三節更衣帶從跨馬入新宋門舊曰朝陽虜名洪仁樓櫓濠塹甚設次入甕城次入大城人煙極凋殘至會同館舊貢院也接伴所得私覲盡貨於此行戶倍償都窮晚食酒貯以黃缸味差勝有以柑子餉承應人得之甚喜云謂之孔果子按東京春秋衛陳鄭三國之境古大梁城也十三日至黃河浮航以渡自南抵北用船八十五隻各闊一丈六七尺其布置相去又各丈餘上實算子木復覆以草曳車牽馬而過如履平地虜以順天名橋予觀駢頭巨艦絳以寸金規制堅壯掃兵守護甚嚴不日我國家恢復河朔過師枕席上云當知此橋爲利之博焉十八里至建津津卽袁紹渡處十四日至湯陰縣湯陰本蕩陰晉侍中嵇紹死節之所又有羨里城羨河羨市文王所囚之地十五日至相州園闐繁盛觀者如堵二樓曰康樂日月白風清又二樓曰翠樓曰秦樓時方賣酒其上牌書十洲春色酒名也或云韓魏公畫錦堂今爲一貴人宅石記猶在好事

者叩門打碑不禁也相出茜草故纈名天下銅雀臺講武城章河紂之朝歌城皆在境內講武南有塔聞是舊鄴於高丘相望名七十二冢世謂曹孟德狙詐惑後人使迷其葬所相實古鄴相魏文侯始封之地十六日至邯鄲縣縣古趙國邯山名鄴盡也邯山至此而盡凡城郭宇從邑故宇皆從邑趙王叢臺在縣之北聞每年三月二十四日空巷上簡子冢冢形如硯世謂硯子冢程嬰公孫杵臼墓亦在焉路逢一細車蓋以青氎頭段人家也頭段者謂貴族及將相之家十七日至邢州古鉅鹿郡故邢侯國也秦兼天下於此置信都縣十八日至內丘縣內丘本漢之中丘未至內丘西望太行山岡巒北走崖谷秀傑如昔所聞山延袤八十里十九日至栢鄉縣縣本春秋晉郭邑之地漢光武卽位於鄗之南六十里至趙州道經光武廟有二石人首橫於路俗傳光武欲渡河二人致餉慮洩其蹤乃除之又云遇二人問途不答怒而斬之已而皆石也未至城五里渡石橋橋從空架起工極堅緻南北長十三丈闊四之一實隋人李春所造元祐間賜名安濟有張果老驢迹二十日至眞定府未至城先過滹沱河河流不甚闊聞當春漲時殊湍急也眞定在春秋時屬鮮虞國二十二

日至新樂縣縣古鮮虞國漢中山孝王母馬昭儀隨王就國王於是建宮於樂里而呼爲西樂城語訛西爲新四十五里至中山府堯始封於此二十四日至安肅軍過白溝河二十五日至涿州黃帝戰蚩尤於涿鹿卽此地二十六日至良鄉縣入內通侍郎李慶和賜錕合湯藥貼用紅綾勅書云勅某卿遠持慶幣來賀誕晨馳華隰以良勞次郊亭而伊邇宜有節宣之餽以彰眷遇之優二十七日過盧溝河卽盧龍也燕人呼水爲龍呼黑爲盧亦謂黑水河色黑而濁其急如箭至燕山府外燕賓館赴班荆宴少定傳銜館伴使昭武大將軍太子少詹事蒲察明少中大夫侍御史鄧儼爲之副南使與之互展起居狀繼與接伴互展辭狀天使敬昊賜宴單仲賜酒果酒九行禮畢趨入城初入端禮門次入南門次入豐宜門次過龍津樓樓亦分三道通用奪玉石扶闌上琢爲嬰兒狀極工巧次入宣陽門由馳道西南入會同館甫就次有天使完顏汴傳宣撫問二十八日忠勇校尉劉彥忠忠翊校尉何彥來交禮物天使烏古論賜酒果宣威將軍充東上閣門副使郭喜說朝見儀二十九日辨色副使率三節入見行司捧國書於馬上前行初出館橫過馳道行而御廊東西曲尺各二

百五十間至掖門下馬自專德門由會通承明二門入左嘉會門趨而南至幕次少頃鳴鐘鐘罷衛士山呼百官裏見時方辰正斯須於幕間見曳玉帶者五人先出後知爲東宮親王平章令公也繼獨引副使捧國書頃之閣門綠衣吏來引都轄以下節之長都轄三節之長先入宣明門次行政門於隔門上面北序立門之裏卽殿庭隙門見副使舞蹈之節俟禮物過副使由右出三節自東入拜於大氈上上有一品至七品黑漆黃字牌子蓋其朝署也一氈可容數百人遍地製成鸞鳳殿九楹前設露臺柱衣文繡兩廊各三十間中有鐘鼓樓兩外垂金漆簾額飾以繡廊之西馬有韞紅繡鞍者數疋乃高麗所進殿門外衛士二三百人分兩傍立盡戴金花帽錦袍宣明門外直至外廊皆甲士青緡甲居左旗執黃龍紅緡甲居右旗執紅龍外廊皆銀鎗左掖門入皆金鎗人依一柱以立焉仁政門左門用甲士訖見無一人跛倚者凡門屋下皆青隊執弓矢人數各有差若乃經從之處宮殿門名茲不具載北宮營繕之制初雖取則東都而竭民膏血終殫土木之費瓦悉覆以琉璃日色暉映樓觀翬飛圖畫莫克摹寫佐佑之初役民兵一百二十萬數年方就死者不計其數三節旣出副使疾作

依柱以立扶策至幕次未畢餘禮小底入報

小底二百人


傳旨免禮數至於殿門外受衣

帶三節繼之是日麗夏使人同見少留俟其禮竟閣門來引復舊路出至嘉會門駐立久之以麗人在門外受賜未畢也歸館久之宣威將軍客省使兼東上閣門盧璣到館押伴置酒殿上近例止就賜副使免坐第拜表謝三節各受衣帶五事尙書公獨以病辭館伴所服以禮例應給使副衣帶各七事有靴而無笏虜無象簡所用皆木質也三十日就館宴天使李顯全賜宴并酒果燕山酒固佳是日所餉極爲醴厚名金澗蓋用金澗水以釀之也三月一日雨免入賀不爾必致霑服失容有習來此者言雖雨立移時不恤也二日天使完顏奕賜分食者分御膳以賜之也九日入辭使副受書而歸十日離館燕古冀州地武王封堯後於薊卽薊縣也隋立涿郡唐爲幽州天寶間曰范陽郡陞爲盧龍軍遼曰燕京名析津府皇朝改曰燕山府虜曰大興府二十三日至東都未至城三二里車夫指一土岡云是名愁臺乃晉少帝北狩之路二十四日押宴鎮國上將軍鎮南軍節度使兼懷州管內觀察使高蘇賜宴并酒果天使趙泳食畢啓行四月十六日至家是行往返凡九十六日 宋周焯撰終

欽定四庫全書提要

滇載記一卷

明楊慎撰慎有檀弓叢訓已著錄是書乃其謫戍雲南時所作統紀滇域原始及各部姓種類舊本與滇程記合爲一篇今以一爲行記一爲地志析之各著錄焉



古今說海

滇載記

說選十九 偏記十六

滇域未通中國之先有低牟苴者居永昌哀牢之山麓今金齒地有婦曰沙壹浣絮水中

觸沈木若有感是生九男曰九隆族種類滋長支裔蔓衍竊據土地散居谿谷分爲

九十九部其渠酋有六各號爲詔夷語謂詔爲王其一曰蒙舍詔今蒙化府其二曰浪施

詔今浪穹縣其三曰鄧賧詔今鄧州其四曰施浪詔今浪穹縣其五曰摩娑詔今麗江府其六

曰蒙雋詔今建昌兵埒不能相君長至漢有仁果時九隆八族之四世孫也强大居昆

彌川今白崖傳十七世至龍祐那當蜀漢建興三年諸葛武侯南征雍闓師次白崖

川獲闓斬之封龍祐那爲酋長賜姓張氏割永昌益州地置雲南郡於白崖諸夷慕

武侯之德漸去山林徙居平地建城邑務農桑諸部於是始有姓氏龍祐那之十六

世孫曰張樂進求遜位於蒙氏考其時蓋唐世也張氏或稱昆彌國或稱白國或稱

建甯國其年系莫可推詳

蒙氏始興曰細奴羅九隆五族牟苴篤之三十六世孫也耕於巍山之麓數有神異

孽牧繁息部衆日盛代張氏立國號曰封民蒙氏僞稱南詔實唐貞觀三年也遷居
瓏牙圖山今蒙化及高宗時遣子入侍朝命授細奴羅以巍州刺史死僞諡高祖又稱

奇王子羅晟嗣

羅晟僭立當高宗上元元年至睿宗景雲中姚州蠻先附吐蕃御史李知古請兵擊
降之築城置州縣重稅賦因誅其豪雋掠其子女爲奴婢羣蠻怨怒引吐蕃攻知古
殺之於是姚雋路絕晟猶奉唐正朔死僞諡世宗子晟羅皮嗣

晟羅皮之立當玄宗先天元年立孔子廟於國中死諡威成王子皮羅閣嗣

皮羅閣之立當玄宗開元十六年受唐冊封爲雲南王賜名歸義於是南詔浸強大
而五詔微弱皮羅閣因仲夏二十五日祭先之期建松明爲樓以會五詔宴醉後羅
閣佯下樓擊鼓舉火焚樓五詔遂滅閣賂劍南節度使求合五詔爲一朝廷許之於
是盡有雲南之地因破吐蕃卒爲邊患不可復制既併五詔乃卜太和形勝左得水
右蒼山山海之交結於子午遂築太和城自蒙舍徙居之立上下二關曰龍首曰龍
尾連陷遼川永昌石鼓沙追賤龍佉跋後遣其孫鳳伽異入朝唐授鴻臚少卿妻以

宗女賜樂一部南詔於是始有中國之樂死子閣羅鳳嗣

閣羅鳳之立以天寶八年故事酋長謁都督偕妻子行鳳挈家至雲南太守張乾陁

皆私之復多徵求鳳怒反攻雲南殺乾陁取夷州三十二陷嵩州獲唐西瀘令鄭回

拜清平官

即其國丞相也

天寶十年夏四月庚寅劍南節度使鮮于仲通將命致討鳳伽異

及段儉魏逆戰於西洱河唐兵死者六萬人仲通僅以身免封儉魏爲清平賜名段

忠國以旌之遂臣於吐番吐番封之爲東帝刻碑國門之外明叛唐非得已也僭國

號曰大蒙始建年號曰贊普鐘十三年劍南留後李宓將兵擊之爲蒙氏所誘全軍

沒焉唐益發兵竟不能克前後死者二十萬人南詔自是始與中國隔絕矣代宗大

歷十四年死僞謚神武子鳳伽異未嗣而死孫異牟尋立

僭改元贊普鐘七長壽十一

異牟尋以唐代宗大歷十四年嗣立有智數善撫衆居史城

史城今喜州也

連兵吐番入寇

唐神策都將李晟擊破之異牟尋懼改城牟賧苴咩

今大理

改國號曰大理自稱曰日

東王僭封五嶽四瀆并立祠三皇廟春秋致祭以國界內點蒼山爲中嶽東川界江

雲露松外龍山爲東嶽

在今祿勸州一名絳雲露山一名雲龍山有十二峯皆峭拔其山有共命鳥穴

銀生部日界蒙樂山

爲南嶽

在今樂甸又名無量山其山千仞有一殿搖柱自空中來天帝娶天女處

永昌騰越界高黎共山爲西嶽

在今騰衝

一名崑崙隅東臨濃江西臨龍川左右有平川名爲穹甸草卉貫四叙不凋瘴氣最惡冬雪至春方融夏秋穹甸炎熾商賈愁怨爲之謠曰冬時欲歸來高黎共上雪夏秋欲歸來無奈穹甸熱春時欲歸來囊中資糧絕

麗江界玉龍山爲北嶽

在今麗江一名聳雪山其山九峯雪貫四時玉立萬仞千里望之若在咫尺與蜀松州諸山相接也

以黑惠江瀾滄江潞江麗江爲四瀆接點蒼之顛添洱河之水立官號曰九爽三托其地東至於銅柱鐵橋蟠桃玉榆東南至於交趾南至於驃國木落山西至於太石西北至於吐番北至於神川東北至於黔巫八方之地屬以八演從中國教令都曰苴咩別都曰善闡皆中國降人爲之經畫也德宗貞元三年鄭回說以大義令復歸唐異牟尋然之會西川節度使韋皋招撫羣蠻尋因求內附而猶結好吐番皋乃爲書遺尋敘其歸化之誠轉至吐番吐番疑之異牟尋歸附之志益堅九年前上表請絕吐番復臣於唐十年自將數萬人襲吐番大破之遣其弟獻圖納貢及吐番所頒金印請復號南詔唐以其功遣使册之賜銀窠黃金印王北面跪受之宴使者出玄宗所賜器物指老笛工歌女曰皇帝所賜龜茲惟二人在耳使者曰南詔當深思祖考子孫勿替盡忠皇唐對曰敢不敬使者之命死僞諡孝恒改元二

上見龍元

子尋閣勸嗣

尋閣勸以唐德宗貞元十五年立死子勸龍晟立

偽諡孝文
改元應道

勸龍晟以唐永貞元年立淫虐不道其臣嵯顛殺之而立其弟勸利晟諡曰幽改元龍興

勸利晟以唐憲宗元和元年立死偽諡靖王子晟豐祐立改元全義

晟豐祐以穆宗長慶四年立趨敢善用其下文宗太和三年西川節度使杜元穎不恤士卒有流入蠻境者蠻衣食之由是盡得蜀之虛實與其臣嵯顛遂謀入寇以蜀卒爲鄉道襲陷邛戎萬三州引兵徑入成都取諸經籍大掠子女工技數萬人及珍貨而還南詔工技文織自是與中國埒矣豐祐乃遣使上表請罪元穎朝廷以李德裕代之德裕保障有方索南詔所掠百姓得四千人豐祐死偽諡昭成子世隆立改元二保和天啓

世隆之立以唐武宗會昌十三年初韋臬開蜀清溪道以通羣蠻入貢又選子弟聚之成都教之書數以羈縻之而軍府不時給其餼須南詔因是不肯入貢及世隆立

朝廷以其名同立宗諱不行冊禮諭令更名謝恩然後遣使會世隆寇寓州事遂寢世隆乃僭稱皇帝懿宗咸通三年西寇安南四年寇交趾殺虜幾十五萬人留兵二萬使其將楊思縉據之谿洞夷獠皆降五年寇邕州敗還七年節度使高駢大破之復定交趾十年世隆傾國入寇陷犍爲及黎雅嘉三州十一年進攻成都不可引還僖宗乾符元年復寇西川陷黎州入寇邛崃關勝負不常二年攻雅州聞高駢改西川遣使請和駢發兵追至大渡河殺獲甚衆擒其酋長數十人四年復寇越寓死於景淨寺自世隆嗣立以來爲邊患殆二十年中國爲之虛耗而其國亦弊僞諡景莊皇帝子隆舜嗣改元建極

隆舜

通鑑作法誤也南詔名皆父子相承世隆之子曰隆舜近是

之立以僖宗乾符四年性好畋獵酣宴委國事

於其臣是歲請和許之又迭請和親廣明元年遣宗正少卿李龜年充使中和元年上表款附三年以宗室女妻之後內嬖失道爲監臣楊登所弑僞諡宣武子舜化眞嗣改元二貞明嗟耶

舜化眞之立以唐昭宗乾甯四年改元中興上書於唐唐欲殺以詔王建言小夷不

足辱詔書臣在南西彼何敢犯塞從之立四年其臣鄭買嗣奪之而滅其國追諡孝哀蒙氏自細奴羅至舜化真十有三世立三百十年而爲鄭氏

鄭買嗣本唐鄭回之後世爲蒙氏清平唐昭宗光化五年旣滅蒙氏而自立改國號曰大長和改元曰安國死僞諡德桓子旻嗣立攻蜀黎州王建發兵大破之俘斬數萬級溺死數萬人求婚於南漢漢主以會城公主妻之改元五曰始元曰天瑞景星曰安和曰貞祐曰初歷死僞諡肅文子隆亶嗣立改元天應未幾爲東川節度使楊千真所殺鄭氏三傳歷年二十有六而爲趙氏

趙氏名善政爲封氏清平楊千真旣殺滅鄭氏遂拔善政而立之後唐明宗之天成三年也改國號曰大天興立僅十月千真又奪之而爲楊氏

楊氏名千真旣奪趙氏而有蒙國改國號曰大義甯改元曰尊聖貪虐無道中外咸怨通海節度使段思平興師問罪千真不能禦走死楊氏立僅二年而段氏興焉

段氏之先武威郡人有名儉魏者佐蒙氏有功賜名忠國擢清平官六傳而生思平思平生有異兆楊千真忌之使人索捕思平逃匿得奇戟於品甸波大村又得神驥

於葉鏡湖

在雲南縣正南大波鋪是也

饑摘野桃剖之核膚有文曰青昔思平拆之曰青乃十二

月昔乃二十一日今楊氏政亂吾當以是日舉義乎遂借兵東方黑爨松爨三十七部皆助之衆至河尾是夕思平夢人斬其首又夢玉瓶耳缺又夢鏡破懼不敢進兵其軍師董迦羅曰三夢皆吉兆也公爲大夫夫去首爲天天子兆也玉瓶去耳爲王者兆也鏡中有影如人有敵鏡破則無影無影則無敵矣三夢皆吉兆也思平乃決明旦引兵欲渡莫知所從見江尾一婦被瓔而浣者指曰人從我江尾馬從三沙矣爾國名大理從之得濟既逐楊氏而有蒙國遂改國號曰大理改元曰文德時後晉天福二年也死僞諡太祖傳子思英立未幾死僞諡文經武皇帝國人立其叔思良思良以後晉開運三年改元至治死僞諡□□傳子思聰

思聰以後周廣順三年立改元三曰明德廣德聖德死僞諡□□傳於素順

素順於思聰未

知何屬也

素順以宋太祖建隆四年立時王全斌既平蜀欲因兵威取滇以圖進於上太

祖鑒唐之禍基於南詔以玉斧畫大渡河曰此外非吾有也由是雲南三百年不通中國段氏得以睨臨熒爨以長世焉素順十七年改元明正死僞諡應道皇帝傳子

素英素英以宋太宗雍熙二年立改元五曰廣明明應明聖明德明治死僞諡昭明傳於素廉

素廉以宋眞宗祥符二年立改元二曰明啓乾興死僞諡敬明傳於素隆

素隆以宋天禧二年立改元曰明通天聖避位爲僧死僞諡秉義傳於素貞

素貞以宋仁宗天聖四年立改元正治死僞諡聖德傳於素興

素興以宋慶厯元年立改元二聖明天明以無道國人廢之而立思廉

思廉以宋慶厯四年立皇祐中廣西儂智高掠廣州敗走大理狄青募死士使大理求之會智高已死於大理函其首至京師段氏至是始聞名於中國思廉立三十一年改元四曰保安政安政德□□死僞諡世宗傳子連義

連義以宋熙甯八年立改元二曰上德廣安爲其臣楊義貞所弑楊義貞篡立自號

廣安皇帝凡四年段氏臣岳侯高智昇遣子昇太起東方兵討滅之而立段壽輝壽輝

連義之從子壽輝立二年改元曰上明傳於正明

正明以宋元豐五年立改元三曰保立建安天祐避位爲僧時國人皆歸心高氏遂

奉高昇太爲主而段氏中絕

高昇太有功段氏爲國人所立以宋哲宗之元符二年立國改國號曰大中國改元上治臨終屬其子太明曰段氏不振國人推我我不得已從之今其子已長可還其故物爾後人勿效尤也太明遵其遺言求段氏餘子正瀆立之而段氏復興號曰後理國高氏世相之賞罰政令皆由之國人稱爲高國主波斯崑崙諸國來貢大理者皆先謁相國焉

正瀆復國改元天授以高太明爲相高太連爲柵主遣太連朝宋求經籍得六十九家立十三年再改元曰開明文安避位爲僧傳子正死嚴僞諡中宗

正嚴以宋徽宗大觀二年立四十年改元四曰日新永嘉保天廣運避位爲僧傳子正興死僞諡憲宗

正興以宋高宗紹興十七年立改元四永貞太寶龍興盛明避位爲僧傳子智興死僞諡景宗

智興以宋孝宗乾道八年立改元五日利貞盛德嘉會元亨安定死僞諡宣宗傳子

智連

智連以宋寧宗慶元六年立改元鳳歷死偽諡享天傳弟智祥

智祥以宋寧宗開禧元年立改元天開仁壽死偽諡神宗傳子祥興

祥興以宋理宗嘉熙三年立改元道隆甲辰元兵攻之高禾逆戰敗死宋遣使祭之
祥興死偽諡孝義傳子興智

興智以元憲宗元年立改元天定壬子歲元忽必烈將兵擊之分三道進自臨洮經
行山谷二千餘里浮金沙江以革囊濟進薄大理興智及高太祥拒戰大敗祥興奔
善闡太祥就擒不屈斬於五華樓下時白日當午忽雲起雷震世祖異之曰忠臣也
遂虜興智滅其國段氏自思平至興智二十二主歷三百五十年

元既滅段氏而有其地得五城八府蠻郡三十有七設大理都元帥府仍錄段氏子
姓世守其土赦興智封爲摩訶羅嗟管領八方興智死元季亂中原多故段氏復據
之於是有十一總管出焉

一代總管曰信直段實元中統二年入覲世祖嘉之賜璽書令總管大理善闡會川

建昌永昌騰越諸郡以功累授行省叅政以攻石城靖今曲及仁德府今尋甸功錫虎符爲總管

二代總管信苴段忠至元中隨元帥伐西林破會川通善闡平休林武定緬甸之役皆有功授金齒宣慰兼掌軍民萬戶府

三代總管信苴段慶元封爲宣武將軍妻以公主入朝歸授雲南省叅政

四代總管信苴段正

五代總管信苴段隆

六代總管信苴段俊

七代總管信苴段義

八代總管信苴段光時元大德中中原板蕩梁王以元宗室鎮善闡與段氏分域構隙至大二年梁王大破光兵光將高蓬守羅那關梁王密招之不從乃賂蓬庖人刺蓬以其首獻梁王王并庖人戮之至治元年玉案山產小赤犬羣吠遍野占云天狗墜地爲赤犬其下有大軍覆境又時雨鐵民舍山石皆穿人物值之多斃謠俗號曰

鐵雨

九代總管段功初襲爵爲蒙化知府至正十二年繼立爲總管癸卯明玉珍自楚入蜀據之分兵四掠號曰紅巾明玉珍自將紅巾三萬攻雲南梁王及憲司官皆奔威楚諸部悉亂功謀於員外楊淵海淵海卦之吉乃進兵至呂閣敗紅巾於關灘江殺獲千計紅巾收合餘衆再戰復勝殺段氏驍酋鐵萬戶紅巾屯古田寺段氏夕潛火其寺紅巾軍亂死者什七八又追至回磴關大敗之紅巾大呼之曰待明年來復仇時功在戰間得玉珍母寄其子書云爾征南務得之不得輕還軍少糧乏我當添補楊淵海效其書跡易之曰中國兵來急爾宜早歸遂募能入紅軍營者有小卒陳惠願行玉珍得書恐國中有變又新失利遂急收軍功追之至七星關又勝之而還紅巾旣退梁王深德段功以女阿禧妻之爲之奏授雲南平章功自是威望大著於西南梁王曲意奉之功戀戀不肯歸國其大理夫人高氏寄樂府促之歸其詞曰風捲殘雲九霄冉冉逐龍池無偶水雲一片綠寂寞倚屏幃春雨紛紛促蜀錦半牀閒鴛鴦獨自宿好語我將軍只恐樂極生悲冤鬼哭功得書乃歸旣而復往其臣楊智張

希喬留之不聽既至善闈梁人私語梁王曰段平章復來有吞金馬嘔碧雞之心矣
 蓋早圖之梁王始啓疑於平章密召阿蓋主命之曰親莫若父母寶莫若社稷功今
 志不滅我不已脫無彼猶有他平章不失富貴也今付汝以孔雀膽一具乘便可毒
 殮之主潛然不敢受命夜寂人定私語平章曰我父忌阿奴願與阿奴西歸因出毒
 具示之平章曰我有功爾家我趾自蹶傷爾父尙嘗爲我裹之爾何造言至此三諫
 之終不聽明日邀功東寺演梵至通濟橋馬逸因令番將格殺之阿蓋主聞變失聲
 哭曰昨暝燭下纔講與阿奴雲南施宗施秀煙花殞身今日果然阿奴雖死奴不負
 信黃泉也欲自盡梁王防衛者乃萬方主愁憤作詩曰吾家住任鴈門深一片閒雲
 到滇海心懸明月照青天青天不語今三載欲隨明月到蒼山悞我一生路裏彩
 名吐嚙吐嚙段阿奴吐嚙可惜也施宗施秀同奴歹歹不也雲片波潏不見人押不蘆花
 也名也顏色改押不蘆乃北方起死回生草名肉屏獨坐細思量肉屏駱駝背也西山鐵立霜瀟灑鐵立松林也平
 章從官員外楊淵海亦題詩粉壁飲藥而卒詩曰半紙功名百戰身不堪今日總紅
 塵死生自古皆由命禍福於今豈怨人蝴蝶夢殘滇海月杜鵑啼破點蒼春哀憐永

訣雲南土錦酒休教灑淚頻梁王哀淵海之才縉意欲爲己用見詩痛悼之乃厚恤之令隨平章樵歸葬大理

十代總管信苴段寶功之子洪武元年嗣職梁王遣矢刺平章七攻大理不克乃講和奏陞寶爲雲南左丞未幾明玉珍復侵善闡梁主遣叔鐵木的罕借兵大理時寶已長答書云殺虎子而還喂其虎母分狙栗而自詐其狙公假途滅虢獻璧吞虞金印玉書乃爲釣魚之香餌繡闈淑女自設掩雉之網羅況平章旣亡弟兄罄絕今止遺一嫠一奴奴再贅華黎氏嫠又可配阿瞿妃如此事諾我必借大兵如其不可待金馬山換作點蒼山昆明池改作西洱河時來矣書後附以詩云烽火狼煙信不符驪山舉戲是支吾平章枉喪紅羅帳員外虛題粉壁圖鳳別岐山祥兆隱麟遊郊藪瑞光無自從界限鴻溝後成敗興衰不屬吾梁王見之恨寶入骨平章女僧奴志恒不忘復仇將適建昌阿黎氏出手刺繡文旗以興寶曰我自束髮聞母稱父冤恨非男子不能報此旗所以識也今歸夫家收合東兵飛檄西洱汝急應兵會善闡又作詩二章曰珊瑚勾我出香閨滿目潛然淚濕衣冰鑑銀臺前長大金枝玉葉下芳菲

鳥飛兔走頻來往桂香梅馨不暫移惆悵同胞未忍別應知含恨點蒼低何彼穠穠
花自紅歸車獨別潁江東鴻臺燕苑難經日風刺霜刀易塞胸雲舊山高連水遠月
新春疊與秋重淚珠恰似通宵雨千里關河幾處逢後寶聞

高皇帝開基金陵遣其叔段眞自會川入京奉表歸款朝廷亦以書報之

見御製文集時

有妖巫女歌曰莫道君爲山海主山海笑諧諧園中花謝千萬朶別有明主來寶數
日疾卒子明嗣

十一代總管信苴段明洪武十四年授以宣慰壬戌春正月天兵破善闡梁王自鳩
黨屬悉俘明遣都使張元亨馳書潁川侯傅友德西平侯沐英麾下曰大理乃唐交
綏之外國善闡實宋斧畫之餘邦難列營屯徒勞兵甲請依唐宋故事寬我蒙段奉
正朔佩華篆比年一小貢三年一大貢友德怒拷辱其使明再上書曰漢武習戰僅
置益州元祖親征祇緣善闡乞冀班師友德答明書曰我大明龍飛淮甸混一區宇
陋漢唐之小智卑宋元之淺圖天兵所至神龍助陣天地應符汝段氏接武蒙氏運
已絕於元世寬命延息以至於今我師已殲梁王報汝世仇不降何待三月傅沐二

將分兵宵緣點蒼顛繞出下關之背先樹旗幟遲明段兵驚潰大軍策馬亂流而濟明遂就擒并其二子仁義至金陵

太祖聖諭曰爾父寶曾有降表朕不忍廢賜長子名歸仁授永昌衛鎮撫次子名歸義授鴈門衛鎮撫大理悉定是夏六月元普顏篤復叛據佛光寨

在鄧州東北

先不華

叛據鄧州甲子正月十七日潁川侯傅友德復自七星關回軍大理平鄧川破佛光寨因定賦法築城隍設衛堡立學校比於中州列郡焉

逸史氏曰史稱西南夷靡莫之屬以什數滇最大元封中以兵臨滇王舉國降然未有稱也及張氏受姓後世迭君長者蒙氏鄭氏趙氏楊氏段氏高氏凡七姓惟蒙段最久故著稱焉夷裔盜名號互起滅若蜂蟻然不足錄也然至與中夏交綏抗陵疲我齊民世主甘心焉以無用戕有用是可慨已漢司馬氏傳西南夷誠有意哉余嬰罪投裔求蒙段之故於圖經而不得也問其籍於舊家有自古通玄峯年運志其書用燹文義兼衆教稍爲刪正令其可讀其可載者蓋盡此矣滇燹於三代爲荒服漢僅剽分其方雖胡元兵力勝之而不能守也於今列箐落而郡縣之馴鱗介而衣

裳之華風沃澤同域共貫昭代恢宇前是孰並傳稱神農地過日月之表幾近是哉夫分隔之亂昔如彼大一統之治今若此干羽不警百五十年探言其故則金匱秘文縉紳罕睹况荒徼乎余慕宋司馬氏作通鑑采獲小說若河洛行年紀廣陵妖亂志者百二十家法孔子著春秋取羣書於百二十國也因是有感遂纂蒙段事以爲滇載記其諸君子祖春秋而述二司馬氏者亦將有取於斯焉

星槎勝覽序

臣聞王者無外中天下而立定四海之民一視同仁篤近舉遠故視中國猶一人而夷狄之邦則以不治治之洪惟聖朝天啓文運太祖高皇帝龍飛九五波澤敷於中外德威振於萬邦太宗文皇帝繼統文明之治格于四表於是屢命正使太監鄭和王景宏侯顯等開道九夷八蠻欽賜璽書禮幣皇風清穆覃被無疆天之所覆地之所載莫不貢獻臣服三五之世不是過矣皇上嗣登大寶詔止海舶及遠征之役蓋以國家列聖相繼奕葉重光治化隆盛而遠夷小醜或梗皇化則移師薄伐使不忘武備以鞏固鴻基爲萬世之宏規也皇上恭默思道端拱而治守盈成之運垂無窮之業得時措之宜也臣本吳東鄙儒草茅下士以先臣戍太倉未幾而蚤世於是臣繼戍役至永樂宣德間選隨中使至海外經諸番國前後數四二十餘年歷覽風土人物之宜采輯圖寫成帙名曰星槎勝覽不揣膚陋

輒敢自敘其首一覽之餘則中國之大華夷之辨山川之險易物產之珍
奇殊方末俗之卑陋可以不勞遠涉而盡在目中矣夫王者無外王德之
體以不治治之王道之用若然將見治化之效聲教所及暴風不作海波
不揚越裳肅慎之民曰中國有聖人在上白雉楛矢之貢不期而至矣
正統元年丙辰春正月吉日臣費信稽首謹序

古今說海

星槎勝覽目錄

卷第一

占城國

賓童龍國

假馬里丁

舊港

卷第二

滿刺加國

東西竺

九州山

卷第三

蘇門答刺國

靈山

真臘國

交欄山

重迦羅

麻逸凍

龍牙門

阿魯國

花面國王

崑崙山

暹羅國

爪哇國

吉里地悶

彭坑

龍牙加貌

淡洋

龍涎嶼

翠藍嶼

錫蘭山國

溜山洋國

大葛蘭國

小葛蘭國

柯枝國

古里國

卷第四

榜葛刺國

卜刺哇國

竹步國

木骨都束國

阿丹國

刺撒國

佐法兒國

忽魯謨斯國

天方國

目錄終

古今說海

星槎勝覽卷一

說選二十偏記十七

占城國

靈山

崑崙山

賓童龍國

真臘國

暹羅國

假馬里丁

交欄山

爪哇國

舊港

重迦羅

吉里地悶

占城國

永樂七年太宗皇帝命正使太監鄭和王景宏等統官兵二萬七千餘人駕海舶四十八號往諸番國開讀賞賜是歲秋九月自太倉劉家港開船十月至福建長樂太平港停泊十二月於五虎開洋張十二帆順風十晝夜至占城國其國臨海有港曰新州西抵交趾北連中國地海船到彼其酋長頭戴三山金花冠身披錦花手巾臂腿四腕俱以金鐲足穿玳瑁履腰束八寶方帶如妝塑金剛狀乘象前後擁番兵五百餘或執鋒刃短鎗或舞皮牌槌鼓吹椰殼筒其部領皆乘馬出郊迎詔下象膝行

匍匐感恩奏貢方物其國所產巨象犀牛甚多象牙犀角廣貨別國棋楠香在一山所產酋長差人禁民不得採取犯者斷其手烏木降香樵之爲薪天無霜雪氣候常熱如夏草木長青隨花隨結煮海爲鹽禾稻甚薄國人惟食檳榔裹萋葉包蠶殼灰行住坐臥不絕於口不解正朔但看月生爲初月晦爲盡如此十次盈虧爲一歲晝夜善槌鼓十更爲法酋長及民下非至午不起非至子不睡見月則飲酒歌舞爲樂酋長所居屋宇門墻俱甃灰甃及以堅木雕鏤獸畜之形爲華外周磚垣亦有城郭兵甲之防禦鏃刀標之屬其部領所居亦分等第門高有限民下編茅覆屋魚不腐爛不食釀不生蛆不爲美酒以米拌藥丸乾和入甕中封固如法收藏日久其糟生蛆爲佳醞他日開封用長節竹幹三四尺者插入糟甕中或團坐五人量人入水多寡輪次吸竹引酒入口吸盡再入水若無味則止有味留封再用酋長歲時採生人膽入酒中與家人同飲又以浴身謂之通身是膽尸頭蠻者本是婦人但無瞳人爲異其婦與家人同寢夜深飛頭而去食人穢物飛回復合其體卽活如舊若知而封固其項或移體別處則死矣人有病者臨糞時遭之妖氣入腹必死此婦人亦罕有

民間有而不報官者罪及一家番人戲之觸弄其頭必有生死之恨男女椎髻腦後花布纏頭上穿短布衫腰圍花布手巾其國無紙筆以羊皮搥薄熏黑削細竹爲筆蘸白灰書字若蚯蚓委曲之狀言語燕鳩全憑通事傳譯

靈山

其處與占城山地連接其山峻嶺而方有泉下繞如帶山頂有一石塊似佛頭故名靈山民居星散結網爲業田肥耕種一歲二收氣候之節男女之禮與占城國大小異地產黑文相對藤杖每條易斗錫一塊若蠹大而紋疎者一錫易杖三條次有檳榔萋葉餘無異物往來販舶必於此樵汲舶人齋沐三日崇佛誦經燃放水燈綵船以禳人船之災

崑崙山

其山節然瀛海之中與占城及東西竺鼎峙相望山高而方山盤廣遠海人名曰崑崙崙洋凡往西洋販舶必待順風七晝夜可過俗云上怕七洲下怕崑崙崙針迷舵失人船莫存此山產無異物人無居竈而食山果魚蝦穴居樹巢而已

賓童龍國

其國與占城山地連接有雙澗水澄清佛書所云舍衛乞食卽此地也日連所居遺址尙存人物風土草木氣候與占城大同小異惟喪事能持孝服設佛而度死者擇僻地葬之婚姻偶合酋首出入或象或馬一如占城王從者前後百餘人執質讚唱日亞日僕地產棋楠香象牙貨用金銀花布之屬民下編茅覆屋以居

眞蠟國

自占城順風三晝夜可至其國門之南爲都會之所有城池周七十餘里石河廣二十餘丈殿宇三十餘所凡歲時一會則羅列玉猿孔雀白象犀牛於前名曰百塔洲金盤金碗盛食諺云富貴眞蠟也氣候常熱田禾豐足煮海爲鹽風俗富饒男女椎髻穿短衫圍梢布法有剗刑刺配犯盜則斷手足番人殺唐人則償命唐人殺番人則罰金無金賣身贖罪地產黃蠟犀象孔雀沉香蘇木大風子油翠毛貨用金銀燒珠錦段絲布之屬

暹羅國

自占城順風十晝夜可至其國山形如白石崎嶇屬于星外山崎嶇內嶺深遠田平而沃稼穡豐熟氣候常熱風俗勁悍壽考長髮披肩都境同檳榔木爲標鎗水牛皮爲牌藥鏃等器慣習水戰男女椎髻白布纏頭穿長衫腰束青花手巾其上下謀議大小事悉決於婦其男一聽苟合無序遇中國男子甚愛之必置酒飲待歡歌留宿婦人多爲尼姑道士能誦經持齋服色略似中國亦造菴觀能重喪禮人死氣絕必用水銀灌養其屍而後擇高阜之地設佛事葬之醱繡爲酒炙海爲鹽地產羅斛香大風子油蘇木犀角象牙翠毛黃蠟以海貽代錢每一萬個准中統鈔二十貫貨用青白花磁器印花布色絹色段金銀銅鐵水銀燒珠雨傘之屬其酋感慕天朝遠惠嘗遣使捧金葉表文貢獻方物

假馬里丁

其方與交欄山相望海洋中山列翠屏引溪水溉田禾穀少收氣候常熱俗慕薄男子髻髮穿竹布短衫圍梢布種芭蕉採其實以代糧煮海爲鹽釀蔗爲酒地產玳瑁羚羊貨用爪哇布燒珠印花布米穀之屬

交欄山

自占城靈山起程順風十晝夜可至其山高而叢林藤竹舵桿桅檣篷簍無所不備胡元時命將高興史弼領兵萬衆駕巨舶征闍婆因遭風至交欄山下其船多損乃登此山造船百號復征闍婆擒其酋長而歸至今居民有中國人雜處蓋此時病卒百餘留養不歸遂傳育於此氣候常暑少米穀以射獵爲業男女椎髻穿短衫繫巫耑布地產豹熊鹿皮玳瑁貨用米穀五色絹青布銅器青碗之屬

爪哇國

古名闍婆自占城起程順風二十晝夜可至其國地廣人稠甲兵爲東洋諸番之雄舊傳鬼子魔天與一罔象青面紅身赤髮相合凡生子百餘常食啖人血肉佛書所云鬼國卽此地也其中人被啖幾盡忽一日雷震石裂中坐一人衆稱異之遂爲國主卽領餘衆驅逐罔象而除其害復生齒安業至今其國之遺文後書一千三百七十六年考之肇在漢時至我大明宣德七年矣其港口入去馬頭曰新村居民環接編茭樟葉覆屋輔店連行爲市買賣其國富饒珍珠金銀鴉鵲石貓睛青紅等石琿

琛瑪璫荳蔻華護子花木香青藍無所不有蓋通商旅最衆也其鸚鵡鸚哥孔雀能馴言語歌曲其倒掛鳥身形如雀而羽五色日間焚好香則收而藏之羽翼間夜則張尾翼而倒掛以放香民好兇強生子一歲便以匕首佩之名曰不刺頭以金銀象牙雕琢爲靶凡男子老幼貧富皆佩於腰間若有爭鬻卽拔刃相刺蓋殺人逃三日而出卽無事矣男子猓頭裸身腰圍單布手巾能飲酌酒重財輕命婦人亦然惟項金珠聯紉帶之兩耳塞菱樟葉圈於竅中其喪事凡主翁病死婢妾輩相對而誓曰死則同往臨殯之日妻妾奴婢皆滿頭簪草花披五色手巾隨屍至海邊或野地昇屍於沙地俾衆犬食盡爲好如食不盡則悲歌號泣堆柴於旁衆婦坐其上良久乃縱火燒柴而死蓋殉葬之禮也蘇魯馬益一地名也爲市聚貨商舶米糧港口有聚獠獠數百相傳唐時其家五百餘口男婦兇惡忽一日有僧至其家與吉凶之事其僧取水喫之俱化爲猿猴止留一老嫗不化今存舊宅土人及商者常設飯食檳榔花果肉類以祭之不然則禍甚驗也杜板一村之地名也海灘有水一泓甘淡可飲稱爲聖水元時使將史彌高興征其國經月不下舟中乏水糧盡二將拜天祝曰奉

天伐蠻若天與我水卽生不與則死遂插鎗鹹苦海中其泉隨鎗湧起水味甘甜衆軍汲而飲之乃令曰天賜助我可力戰也兵威由是大振噉聲奮擊番兵百萬餘衆悉敗走乘勝長驅生擒番人烹而食之至今稱中國能食人也遂獲酋長以歸旣服罪尋放還仍封爲爪哇國王我朝太宗文皇帝遣正使太監鄭和等捧詔勅賞賜國王王妃及部領村主咸受天賜其國王遣使絡繹進貢方物

舊港

古名三佛齊國自爪哇順風八晝夜可至其處自港口入去田土甚肥倍於他壤古云一年種穀三年生金言其米穀盛而多買金也民故富饒俗囂好淫水戰甚慣其處水多地少部領者皆在岸造屋居之周匝皆僕從住宿其餘民庶皆於木筏上蓋屋而居以木椿拴閘或水長則筏浮起不能沒也或欲別居起椿去之連屋移徙不勞財力今爲爪哇所轄風俗與爪哇大同小異地產黃熟香速香沉香黃蠟鶴頂之類貨用燒煉五色珠青白磁器銅鼎五色布絹色段大小磁甕銅錢之屬永樂十三年鄭和等統舟師往諸番國海寇陳祖義等聚衆於三佛齊國抄掠番商欲來

犯我舟師和等伏兵敗之生擒厥魁獻俘闕下由是薄海內外罔不清肅


重迦羅

其地與爪哇界相接高山奇秀內有一石洞前後三門可容一二萬人田穀與爪哇略同氣候常暑風俗頗瀆男女撮髻身披單布長衫圍梢布手巾無酋長以年高德者主之煮海爲鹽釀秫爲酒地產羚羊鸚鵡木綿椰子綿紗貨用花銀花絹其處約去數日水程曰孫陀羅琵琶拖曰丹重曰圓嶠曰彭里不事耕種專尙寇掠與吉陀崎諸國相通所以商舶少能至矣

吉里地悶

其國居重迦羅之東連山茂林皆檀香樹無別產馬頭商聚十二所有酋長田肥穀盛氣候朝熱暮寒男女斷髮穿短衫夜臥不蓋其體商舶到彼皆婦女到船交易人多染疾病十死八九蓋其地瘴氣及其姪汚之故也貨用金銀鐵器磁碗之屬

星槎勝覽卷一終



古今說海

星槎勝覽卷二

說選二十一 偏記十八

滿刺加國

麻逸凍

彭坑

東西竺

龍牙門

龍牙加貌

九州山

阿魯國

淡洋

滿刺加國

其處舊不稱國自舊港順風八晝夜可至其國傍海山孤人少受弱於暹羅每歲輸金四十兩爲稅田瘠少收內有山泉流爲溪於溪中淘沙取錫煎成塊曰斗錫每塊重官秤一斤四兩及織芭蕉心簞惟以斗錫通市無他產氣候朝熱暮寒男女椎髻身膚黑漆間有白者唐人種也俗尙瀟厚民淘錫網魚爲業屋如樓閣而不鋪板但用木高低層布連床就榻箕踞而坐飲食廚廁俱在上貨用青白磁器五色燒珠色絹金銀之屬永樂七年鄭和等捧詔勅賜銀印冠帶袍服建碑封爲滿刺加國暹羅始不敢擾十三年酋長感慕聖恩挈妻子涉海入朝貢方物賞勞之使歸國

麻逸凍

其處在交欄山之西南洋海中山峻地平夾溪聚村落而居氣候稍熱男女椎髻穿長衫圍色布田膏腴倍收他國尙節義婦喪夫則削髮務面絕食七日夫死同寢多有並逝者七日不死則親戚勸以飲食若得甦終身不再嫁矣至焚夫日多赴火死
煮海爲鹽釀蔗爲酒產木棉黃蠟玳瑁檳榔花布貨用銅鼎鐵塊五色布絹之屬

彭坑

其處在暹羅之西石崖周匝崎嶇遠望山平如塞田沃米穀豐足氣候溫風俗尙怪刻香木爲人殺人血祭禱求福禳災男女椎髻繫單裙富家女子金圈四五飾於頂髮常人五色燒珠穿圈煮海爲鹽釀漿爲酒地產黃熟香沉香片腦花錫降香貨用金銀色絹爪哇布銅鐵器鼓板之屬

東西竺

其山與龍牙門相望海洋中山形分對嵯峨若蓬萊萬丈之間田瘠不宜稼穡歲藉諸邦淡洋米穀以食氣候不齊煮海爲鹽釀椰子爲酒男女斷髮繫稍布地產檳榔

木綿布蕉心篋貨用花錫胡椒鐵器之屬

龍牙門

其處在三佛齊西北山門相對若龍牙狀中通船過山田瘠米穀甚薄氣候常暑四五月淫雨男女椎髻穿短衫圍稍布擄掠爲豪遇番舶則以小舟百數迎敵若順風僥倖而脫否則被其刦殺舟客於此防之

龍牙加貌

其地離麻逸凍順風三晝夜程內平而外峯民蟻附而居氣候常熱田禾勤熟俗尙敦厚男女椎髻圍麻逸凍布穿短衫以親戚尊長爲重一日不見則攜酒殺問安糞海爲鹽釀秫爲酒地產沉速降香黃蠟鶴頂蜂蜜砂糖貨用印花布八察都布青白花磁器之屬

九州山

其山與滿刺加近產沉香黃熟香林木叢生枝葉茂翠永樂七年鄭和等差官兵入山採香得徑有八九尺長六七丈者六株香味清遠黑花細紋山人張目吐舌言我

天朝之兵威力若神

阿魯國

其國與九州山相望自滿刺加順風三晝夜可至其國風俗氣候與蘇門答刺大同小異田瘠少收盛種芭蕉椰子爲食男女裸體圍梢布常駕獨木舟入海捕魚入山採米腦香物爲生各持藥鏃弩防身地產鶴頂片米糖腦以售商舶貨用色段色絹磁器燒珠之屬

淡洋

其處與阿魯山地連接去滿刺加三日程山遶周圍有港內通大溪汪洋千里奔流出海清甜味甘舟人過往汲之名曰淡洋田肥禾盛米粒尖小炊飯甚香地產香民俗頗淳氣候常熱男女椎髻腰圍梢布貨用金銀鐵器磁器之屬

古今海說

星槎勝覽卷三

說選二十一 附記十九

蘇門答刺國

花面國王

龍涎嶼

翠藍嶼

錫蘭山國

溜山洋國

大葛蘭國

小葛蘭國

柯枝國

古里國

蘇門答刺國

古名須文達那自滿刺加順風九晝夜可至其國傍海村落田瘠少收胡椒蔓生延蔓附樹枝葉如扁豆花間黃白結椒纍垂如椶櫚子但粒小耳番秤一播苛抵我官秤三百二十斤價銀錢二十個重銀六兩金抵納即金錢也每二十個重金五兩二錢風俗頗淳民網魚爲生朝駕獨木刳舟張帆出海暮則回舟男子髮纏白布腰圍梢布婦女椎髻裸體腰圍色布手巾其瓜茄一種五年結小再種橘柚酸甜之果常花常結其有一等瓜皮若荔枝如瓜大未剖之時甚臭如爛蒜剖開如囊味如酥油

香甜可口煮海爲鹽釀茭樟子爲酒貨用青白磁器銅鐵爪哇布色絹之屬永樂十一年僞王蘇幹刺寇侵本國酋長遣使赴闕陳訴請救太宗皇帝命鄭和等就率官兵剿捕生擒僞王至永樂十三年歸獻闕下諸番震服

花面國王

其國與蘇門答刺鄰境傍南巫里洋逶迤山地田足稻禾氣候不常風俗淳厚男子皆以墨刺面爲花獸之狀獠頭裸體單布圍腰婦女圍色布披手巾椎髻腦後地多出牛羊雞鴨羅布強不奪弱上下自耕而食富不驕貧不盜可謂善地矣地產香味青蓮花近布那姑兒一山產硫黃我朝海船駐紮蘇門答刺差人船於其山採取硫黃貨用段帛磁器之屬其酋長感慕恩賜常貢方物

龍涎嶼

望之獨峙南巫里洋之中離蘇門答刺西去一晝夜程此嶼浮澗海面波激雲騰每至春間羣龍來集於上交戲而遺涎沫番人拏駕獨木舟登此嶼採取而歸或風波則人俱下海一手附舟旁一手楫水而得至岸其龍涎初若脂膠黑黃色頗有魚腥

氣久則成大塊或大魚腹中刺出若斗大亦覺魚腥焚之清香可愛貨於蘇門答刺之市官秤一兩用彼國金錢十二個一斤該金錢一百九十二個准中國銅錢九千個價亦非輕矣

翠藍嶼

其山在龍涎之西北五晝夜程大小七門門中皆可過船傳聞釋迦佛昔經此山浴於水被竊其袈裟佛誓云後有穿衣者必爛其皮肉由此男女今皆削髮無衣止用樹葉糾結而遮前後米穀亦無惟下海網魚蝦及種芭蕉椰子爲食然船去未嘗得泊山下宣德壬子十月二十二日因風水不偶至此山泊繫三日夜山中之人駕獨木舟來買椰實舟中男婦果如前言

錫蘭山國

其國自蘇門答刺順風十二晝夜可至其國地廣人稠貨物多聚亞於爪哇中有高山參天山頂產有青美藍石黃鴉鵲石青紅寶石每遇大雨衝流山下沙中拾取之其海旁有珠簾沙常以網取螺蚌傾入池中作爛淘珠貨之海邊有一盤石上印足

跡長三尺許常有水不乾稱爲先世釋迦佛從翠藍嶼來登此山足躡其跡至今尙存也下有寺稱爲釋迦佛涅槃眞身側臥在寺亦有舍利子在其寢處氣候常熱民俗富饒米穀豐足地產寶石眞珠龍涎香乳香貨用金錢銅錢青花白磁器色段色絹之屬男女繞頭穿長衫圍單布永樂七年鄭和等齎詔勅金銀供器綵妝織金寶幡布施於寺及建石碑賞賜國王頭目其王亞烈苦奈兒負固不供謀害舟師太監鄭和潛備先發制之使衆銜枚疾走夜半聞砲則奮擊而入生擒其王至永樂九年歸獻闕下尋蒙恩宥俾復舊國由是西夷畏威懷德莫不向化矣

溜山洋國

自錫蘭山別羅里南去順風七晝夜可至其山海中天巧石門有三遠望如城門中可過船溜山有八沙溜官嶼溜人不知溜起來溜麻里溪溜加平年溜加安都里溜其八處網捕溜洋大魚作塊曬乾以代糧食男子拳髮穿短衫圍梢布風俗囂強地產龍涎香貨用金銀段帛磁器米穀之屬其酋長感慕聖恩常貢方物傳聞又有三萬八千餘溜山卽弱水三千之說也亦有人聚巢居穴處不識米穀但捕魚蝦爲食

裸形無衣惟緜樹葉遮其前後若商舶因風落其瀛人船不可復矣

大葛蘭國

地與都欄樵相近厥土黑墳本宜穀麥居民懶事耕作歲賴烏爹之米爲食商船爲風所阻不以時到則波濤激灘載貨不敢滿蓋以不可停泊之故也若過巫里洋則懼重險之難矣及有高頭埠沉水羅股石之危風俗淳厚男女纏頭穿單布長衫圍色布手巾地產胡椒椰子溜魚檳榔貨用金錢青白花磁器布段之屬

小葛蘭國

山連赤土地與柯枝國接境日中爲市西洋諸國之馬頭也本國通使大金錢名儻伽每個重八分小金錢名吧喃四十個准大金錢一個田瘠少收歲藉榜葛刺國米爲食氣候常熱風俗小瀉男女多回回喃毗人地產胡椒亞於下里乾檳榔波羅蜜色布其木香乳香真珠珊瑚酥油孩兒茶梔子花皆自他國來也貨用丁香荳蔻色段麝香金銀銅鐵器鐵線黑纓之屬

柯枝國

其處與錫蘭山對峙內通古里國界氣候常熱田瘠少收村落傍海風俗頗瀆男女
椎髻穿短衫圍單布又一種曰木瓜無屋舍惟穴居巢樹入海捕魚爲業男女裸體
綉結樹葉或草遮其前後行人遇人則蹲避道旁俟過方行蓋避羞也地產胡椒甚
廣富家俱置板倉貯之以售商販行使小金錢名吧喃貨用色段白絲青花白磁器
金銀之屬其酋長感慕聖恩常貢方物

古里國

錫蘭山起程順風十晝夜可至其國當巨海之要嶼與僧迦密邇亦西洋諸國之馬
頭也山廣地瘠麥穀頗足風俗甚厚行者讓路道不拾遺法無刑杖惟以石灰畫地
乃爲禁令其酋富居深山傍海爲市聚貨通商男子穿長衫頭纏白布婦女穿短衫
圍色布兩耳懸帶金牌絡索數枚其項上眞珠寶石珊瑚連掛纓絡臂腕足脛皆金
銀鐲手足指皆金銀庸寶石戒指髮堆腦後容白髮黑其有一種裸身之人曰木瓜
與柯枝國同地產胡椒亞於下里俱有倉廩貯之以待商販有薔薇露波羅蜜孩兒
茶印花被面手巾其有珊瑚眞珠乳香木香金珀之類皆由別國來其好馬自西番

來匹價金錢千百貨用金銀色段青花白磁器燒珠麝香水銀樟腦之屬曾長感慕
聖恩常遣使捧金葉表文貢獻方物

星槎勝覽卷三



古今說海

星槎勝覽卷四

說選二十三偏記二十

榜葛刺國

卜刺哇國

竹步國

木骨都束國

阿丹國

刺撒國

佐法兒國

忽魯謨斯國

天方國

榜葛刺國

自蘇門答刺順風二十晝夜可至其國卽西印度之地西通金剛寶座國曰詔納福兒乃釋迦得道之所永樂十三年二次上命少監侯顯等統舟師齋詔勅賞賜國王王妃頭目其國海口有港曰察地港立抽分之所其王知我中國寶船到彼遣部領齋衣服等禮人馬千數迎港口起程十六站至瑣納兒江有城池街市聚貨通商又差人齋禮象馬迎接再行二十站至板獨哇是酋長之居處城郭甚嚴街市鋪店連楹接棟聚貨百有其王之舍皆磚灰甃砌高廣殿宇平頂白灰爲之內門三重九間長殿其柱皆黃銅包飾雕琢花獸左右長廊內設明甲馬隊千餘外列巨漢明盛明

甲執鋒刃弓矢威儀壯甚丹墀左右設孔雀翎傘蓋百數又置象隊百數於殿前其王於正殿高座嵌八寶箕踞坐其上劍橫於膝乃令銀柱杖二人皆穿纏頭來引道前五步一呼至中則止又金柱杖二人接引如前禮其王拜迎詔勅扣頭加額開讀賞賜受畢鋪絨毯於殿地待我天使宴我官兵禮之甚厚燔炙牛羊禁不飲酒恐亂性而失禮以薔薇露和香蜜水飲之宴畢復以金盃金繫腰金瓶金盃贈天使其副使皆以銀盃銀繫腰銀瓶銀盃贈之其下官員亦贈以金鈴紉紵絲長衣兵士俱有銀錢蓋此國富而有禮者也其後躬置金筒金葉表文差使臣齎捧貢獻方物於廷其國風俗甚厚男子白布纏頭穿白布長衫足穿金線羊皮靴濟濟然有文字者衆凡交易雖有萬金價定打手永無悔改婦女穿短衫圍色布絲錦不施脂粉自然嬌白耳垂寶鈿項掛纓絡髻堆腦後四腕金鐲手足戒指其有一種曰印度不食牛肉飲食男女不同處夫死不再嫁妻死不再娶若孤寡無倚一村人家輪流養之不容別村求食其義氣有足稱者田沃豐足一歲二收不用耘耔隨時自宜男女勤於耕織果有波羅蜜大如斗甘甜甚美菴摩羅香酸甚佳其餘瓜果蔬菜牛馬雞羊鳧鴨

海魚之類甚廣通使海貳准錢市用地產細布撒哈喇毯絨兜羅錦水晶瑪瑙珊瑚眞珠寶石糖蜜酥油翠毛各色手巾被面貨用金銀段絹青花白磁器銅鐵麝香銀硃水銀草蓆之屬

卜刺哇國

自錫蘭山別羅南去二十一晝夜可至其國與木骨都束國接連山地傍海而居壘石爲城砌石爲屋山地無草木地廣斥鹵有鹽池但投樹枝於池良久撈起結成白鹽風俗頗淳無田耕種捕魚爲業男女拳髮穿短衫圍梢布婦女兩耳帶金錢項掛纓絡惟有葱蒜無瓜茄地產馬哈獸狀如麝鑿花福祿狀如花驢豹鹿犀牛沒藥乳香龍涎香象牙駱駝貨用金銀段絹米豆磁器之屬其酋長感慕恩賜進貢方物

竹步國

其處與木骨都束山地連接村居寥落壘石爲城砌石爲屋風俗亦淳男女拳髮男子圍布婦女出則以布兜頭不露身面山地黃赤數年不雨草木不生絞車深井網魚爲業地產獅子金錢豹駝蹄雞有六七尺高者其足如駝蹄龍涎香乳香金珀貨

用土硃段絹金銀磁器胡椒米穀之屬酋長受賜感化奉貢方物

木骨都束國

自小葛蘭順風二十晝夜可至其國瀕海堆石爲城壘石爲屋四五層廚廁待客俱在其上男子拳髮四垂腰圍梢布女人髮盤於腦黃漆光頂兩耳掛絡索數枚項帶銀圈纓絡垂胸出則單布兜遮青紗蔽面足履皮鞋山連地曠黃赤土石田瘠少收數年無雨穿井甚深絞車以羊皮袋水風俗囂頑操兵習射其富民附舶遠通商貨貧民網捕海魚曬乾爲食及饑養駝馬牛羊地產乳香金錢豹龍涎香貨用金銀色段檀香米穀磁器色絹之屬其酋長效禮進貢方物

阿丹國

自古里國順風二十二晝夜可至其國傍海而居草木不生田肥種植粟麥豐盛壘石爲城砌羅股石爲屋三四層高廚房臥室皆在其上風俗頗言民下富饒男女拳髮穿長衫婦女出則用青紗蔽面布帽兜頭不露形貌兩耳垂金錢數枚項掛纓絡產地羚羊自胸中至尾垂九塊名爲九尾羊千里駱駝黑色花驢駝蹄雞金錢豹貨

用金銀色段青白花磁器檀香胡椒之屬其酋長感慕恩賜躬以方物貢獻

刺撒國

自古里國順風二十晝夜可至其國傍海而居壘石爲城連山曠地草木不生牛羊駝馬皆以海魚乾啖之氣候常熱田瘠少收惟有麥耳數年無雨鑿井絞車羊皮袋水男女拳髮穿長衫婦女妝點兜頭與忽魯謨斯國同壘石築土爲屋三四層者其上廚廁臥室待客其下奴僕居之地產龍涎香乳香千里駱駝民俗淳厚喪葬有禮有事禱於鬼神其酋長感慕聖恩遣使捧金葉表文奉貢方物貨用金銀段絹磁器米穀胡椒檀香金銀之屬

佐法兒國

自古里國順風二十晝夜可至其國壘石爲城砌羅股石爲屋有高三四層若塔之狀廚廁臥室皆在其上田廣少收山地黃赤亦不生草木民捕海魚曬乾大者人食小者餵養牛馬駝羊男女拳髮穿長衫女人出則以布兜頭面不令人見風俗頗淳地產祖刺法金錢豹駝蹄鳥乳香龍涎香貨用金銀檀香米穀胡椒段絹磁器之屬

其酋長感慕恩賜遣使奉貢方物

忽魯謨斯國


自古里國十晝夜可至其國傍海居聚民爲市地無草木牛羊駝馬皆食海魚乾或言深山中亦有草木風俗頗淳壘石爲城酋長深居練兵畜馬田瘠麥廣穀少民富饒山連五色皆是鹽也鑿之鏟爲盤碟碗器之類食物就用而不加鹽矣壘石爲屋有三四層者其廚廁臥室待客之所俱在上男子拳髮穿長衫善弓矢騎射女子編髮四垂黃漆其頂出則布幔兜頭面用青紅紗布以蔽之兩耳輪周掛絡索金錢數枚以青石磨水妝點眼眶脣臉花紋以爲美飾項掛寶石眞珠珊瑚紉爲纓絡臂腕腿足皆金銀鐲此富人也行使金銀錢產有眞珠寶石金珀龍涎香撒哈刺梭腹絨毯貨用金銀青花磁器五色段絹木香胡椒之屬其酋長感慕恩賜躬獻方物

天方國

其國自忽魯謨斯四十晝夜可至其國乃西海之盡也有言陸路一年可達中國其地多曠漠卽古筠冲之地名爲西域風景融和四時皆春也田沃稻饒居民安業男

女穿白長衫男子削髮以布纏頭婦女編髮盤頭風俗好善酋長無科擾於民亦無刑罰自然淳化不作盜賊上下安和古置禮拜寺見月初生其酋長與民皆拜天號呼稱揚以爲禮餘無所施其寺分爲四方每方九十間共三百六十間皆白玉爲柱黃甘玉爲地中有黑石一片方丈餘曰漢初時天降也其寺層次高上如塔之狀每至日落聚爲夜市蓋日中熱故也地產金珀寶石眞珠獅子駱駝祖刺法豹麝馬有八尺高者名爲天馬貨用金銀段正色絹青白花磁器鐵鼎鐵銚之屬其國王臣深感天朝使至加額頂天以方物獅子麒麟貢於廷

星槎勝覽卷四終





A541 212 0017 0122B

宣統元年七月出版

不許複製

藏版者

集成圖書公司

印刷所

北京崇文門內船板胡同
集成圖書公司
電話總局五百八十五號

總發行所

上海棋盤街
集成圖書公司

分發行所

北京 天津 漢口 廣東 山西
集成圖書公司

經售處

各埠大書坊

古今說海全部計十二冊
定價大洋四元正

